

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha.

² Tí xrankíxixín na mé tí nkexro xráxín kjuák'eko Dios

³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án.

⁴ Jehé ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni.

⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan.

⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a.

⁸ A ntá tí ch'ín Juan la jehya tí xrohi a. Ó k'uituēnhón ch'án kui ch'án kixin tsochrónka ch'án nkerí kuènte tí xrohi a.

⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

10 Kjuák'e ch'án chjasintajni na mé Dios tsíkjich'é_naxín ch'án chjasintajni tí kjuachaxin kuénte tí nkexro a na kjónté kjuák'e ch'án chjasintajni na naxa kjuátsoanhya sín ch'án.

11 Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án.

12 A ntá tí sín kuítekaon sín ch'án mé k'uáyéhe sín kjuachaxin kíxin ts'óna sín xjeen Dios.

13 Ntá yóehya ts'axrjeníxin sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

14 A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuèhé ch'án chojni chjasintajni la ko imá ntoá chrónka ch'án. Kuayeni k'uíkonní kíxin imá t'etóan ch'án kíxin jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'etóan ch'án.

15 Ch'ín Juan mé chrónka ch'án nkexrí tjen tí nkexro a. Ntáchro ch'án kíxin:

—Senó k'uékjáhohará kíxin chr'éxin tsi tí nkexro a, na mé antsí má t'etóan ch'án, a ntá janhan la náhí kíxin tí janhan naxa kohyana la tí jehe ch'án la ó xráxin tjen ch'án —mé xíkaha chrónka ch'ín Juan.

16 Kaínni ó k'uáyéheni tí kjuachaxin jíé tjetjanjon ch'án la ko antsí má tjencheyaonni ch'án la ko tjencheyaonni ch'án.

17 Dios mé tsík'etuēnhen ch'ín Moisés kíxin tsokjin ch'án tí ley. A ntá Ìnchéni Jesucristo mé kjuakoxin ch'án kíxin nkexrí imá tjuèhé Dios tí

chojni chjasintajni. A ntá kaín nkehe chrónka ch'án mé antsí ntoá.

¹⁸ Kohya ninkexró chjasintajni k'uikon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

Ch'in Juan mé chrónka ch'án nkexríchi tjen ch'in Jesús

(Mt. 3.11-12; Mr. 1.7-8; Lc. 3.15-17)

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuinixjehe sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

²¹ Ntá xíkjanchankíhi sín ch'án ínaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'in Juan la xíkjatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanchankíhi sín ch'án ínaá kixin:

—¿Á jaha tí nkexro tjejóchóhenni itsi tsochrónka itén Dios? —ichro sín.

Na ntá ntáchro ch'in Juan ínaá kixin:

—Náhi. Janhya —ichro ch'án.

²² Ntá kjuanchankíhi sín ch'án ínaá kixin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

23 Ntá kjuátēhe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntja ntoí tsixin Ìnchéni” —mé xikaha ichro ch'án kjuátēxín ch'án itén ch'ín Isaías k'uéchrónka xroon itén Dios ósé.*

24 A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan.

25 A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya njnko tí nkexro k'uéchrónka itén Dios ósé. ¿A ntá nkekuèté tikite chojni tí xikaha? —mé ichro sín.

26 Ntá ntáchro ch'ín Juan kixin:

—Janhan na mé ìnta ó tikitexián chojni. Ó ntihi tjenkákjan ijnko nkexro naxa tjátsoanhyará.

27 Jehe ch'án mé tsi ch'án nóton tí janhan. A ntá antsí má t'etōan ch'án, a ntá janhan na kénhyó. A ntá tōsuàna chrókjuasíntanka tí correa tokaté ch'án —ichro ch'án.

28 Kaín tíha mé tsíkónhen tí chjasin it'in Betábara tí nó tjitōxin yaon tóhe tí ntario Jordán tí kjuák'e ch'ín Juan kuikite chojni.

Ch'ín Jesús na mé éxíyóhe ijnko kolélo kuènte Dios

29 A ntá tí yaon chr'éxin mé k'uíkon ch'ín Juan kixin ó tjekui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjehérá tí nkexro tjekui mé tí Kolélo kuènte Dios jehe ch'án. Tíha mé tsjinxín ijje chojni chjasintajni.

* 1:23 Isaías 40.3

³⁰ Janhan mé k'uéxrjanka kixin tí iton tí janhan mé tsichréhe ijnko nkexro antsí t'etōan, a ntá janhan la kénhyó tétōan kixin naxa kohyana na jehe ch'án la ó xráxín tjen ch'án.

³¹ Kjaxin janhan naxa chonhya nkexro tíha. A ntá xra ó k'uinka kjuak'é kuíkítexián chojni ìnta kixin tí chojni naciōn Israel mé chrókjuátsōanxín sín ch'án —ichro ch'ín Juan

³² Kjuintaxín ntáchro ch'ín Juan kixin:

—Ó k'uíkuan kixin tí Nchakuen Dios mé k'uínkajinxin nkaya nkajni na éxí yóhe ijnko kontóá k'uínkajin la ko kjuák'e va ntoí tí tjen ch'án.

³³ A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsíkítexián chojni ìnta mé tsíchrónka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsōanxián janhan kixin tí nkexro a mé tsíkítexín ch'án Nchakuen Dios chojni.

³⁴ A ntá janhan jie mé ó k'uíkonxín kuan kixin xikaha kónhen tí jehe ch'án, a ntá xrjankaxián kixin táha mé Xjeen Dios tíha —mé xikaha chrónka ch'án.

Tí sín saoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án,

³⁶ a ntá xrinahya k'uíkon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús.

³⁸ Ntá kuinkátjía ch'ín Jesús k'uikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjeyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátēhe ch'án ntáchro ch'án kixin:

—Ìntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uéjoko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehé ch'án chónka ch'án ijnko savé mé it'in Simón Pedro.

⁴¹ Na ntá tuénxín tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sjintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxín mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

44 A ntá tí ch'ín Felipe mé chjasén ch'án mé it'ín Betsaida tí chjasén ch'ín Andrés la ko ch'ín Pedro.

45 Ntá tí ch'ín Felipe mé sákjuíkjoyá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxí k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetōan Dios. Kjaxin tí sín k'uéchrónka tí itén Dios chr'éxin mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'ín Jesús, la it'é mé it'in José, la mé chjasén ch'án mé Nazaret —ichro ch'ín Felipe.

46 A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

47 Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

48 Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxā nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

49 Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuenhén tí nación Israel —ichro ch'án.

50 Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uíkuan tjenkankiá nta t'óna to higo, jehya táhó tsítekákoxnian. Náhí. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuènte Dios mé ts'ít'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí ìné ch'ín Jesús tsík'íyehé sín tjan la ntiha tjen tjan koí.

² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha.

³ Ntá ó tsík'ankehe sín tí xranvino ik'uí sín na ntá tí ìné ch'ín Jesús mé ntáche tjan tí jehe ch'án kixin:

—Ó tsík'ànka xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsonhen chronka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí ìné ch'án na mé ntáche tjan tí sín ch'e xra kixin:

—Tí chrén nkehe chrók'uetuanhanrá ch'án chrókjuinchexiteyará —ichro tjan.

⁶ A ntá siín ntiha injon chj tsík'óna xro na mé tíha tjiá ntá t'ònti sín kixin xikaha mé ts'axrjehe tí jie chóna sín koí, mé xikaha kuinkáchónki tí sín judío. Na mé jnkojnko chj mé tjacha tikia ochenta litro la o ciento litro ntá.

⁷ Ntá k'uetuēnhen ch'ín Jesús tí sín ch'e x̄r̄a k̄ixin:
—Tík̄iará nt̄a kaín tí ch̄i a ts̄okaón —ichro ch'án.
Ntá kjuínchexiteyá sín kjuínchekaón sín nt̄a jnko-
jnko tí ch̄i a.

⁸ A ntá ntáche ch'ín Jesús tí jehe sín inaá k̄ixin:
—Ták̄já intsí nt̄a tjiá ch̄i tjikuehé tí ch'ín t'et̄oan
tí kia a —ichro ch'án.

Ntá x̄ikaha kjuích'e sín kjuínchexiteyá sín.

⁹ A ntá tí ch'ín t'et̄oan tí kia a mé tsjexín ch'án
tí nt̄a tsík'óna xranvino kjónté noehya ch'án nketí
kuix̄in tí xran a. Jehó tí sín ch'e x̄r̄a kuik̄ao sín mé
nohe sín k̄ixin jehe sín mé tsík̄akitsje sín nt̄a. Ntá tí
ch'ín t'et̄oan mé k'uíyeh̄e ch'án tí ch'ín tsíkót̄eh̄e.

¹⁰ Ntáche ch'án k̄ixin:

—Xr̄axín tí sín tjasin kia la senó tí xranvino
náxrjón tjanjon sín na tió chrók'uihya tí sín
tsíkóchjina na ntá tjanjon sín tí xranvino
náxrjónhya. A ntá jaha la náhí. Senó kjuakéchjina
tí xranvino ant̄sí má náxrjón, a ntá tí jie tjetjánjuan
jaha —ichro ch'án.

¹¹ Tí kjuaxroan a kjuích'e ch'ín Jesús chjasin
Caná estado Galilea mé tí kjuaxroan saoxín
kjuasin ch'án mé kjuakox̄in ch'án nkexrí imá
jié tí kjuachaxin kuènte ch'án, a ntá tí sín k'uájiko
ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin
Capernaum, sákjuíko ch'án iné ch'án la ko kichó
ch'án la ko tí sín k'uájiko ch'án, kóxrjenhen sín ntiha
iso yaon.

*Ch'ín Jesús mé kjuínchetjóa ch'án tí n̄inko jié
(Mt. 21.12-13; Mr. 11.15-18; Lc. 19.45-46)*

13 **A** ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén.

14 Ntá nkaxenhen tí n̄nko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótxaxin tí sín tjinkíxixin chichaon.

15 Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen n̄nko kaín xín sín la ko tí kolélo la ko tí koxinta. Na ntá tí ntamesa tjinkítóxixin sín tí chichaon mé kótéka ch'án tsíkjaminkí xènjín tí chichaon a.

16 Ntá k'uetuēnhen ch'án tí sín nchekji tí kontóá a ḱixin:

—Takítsjerá kaín tí nkehe a. Ch'énahyará ijnko ntasin tí ntōe T'aná ntihi —ichro ch'án.

17 Ntá xráxinkaon tí sín k'uájiko ch'án ti nkehe tsíkjin sín ósé ḱixin: “Éxí xrohi k'uákjen asenná nínkavan ḱixin tí ntōa tjikosáyehya sín.” *

18 Ntá tí sín judío mé kjuanchankíhi sín ch'án ḱixin:

—¿Xá nkerí kjuaxroan tsjásixián tsjákoxian nketí kjuachaxin chonta ḱixin xíkaha kjuích'e tíhi? —ichro sín.

19 Ntá kjuátēhe ch'ín Jesús ḱixin:

—Tí ts'oxíkará tí n̄nko i ntá iníkoá yaon la ó sit'ána n̄ixin tsjak'e ínaá —ichro ch'án.

20 Na ntá ntáchro tí sín judío a ḱixin:

—Cuarenta y seis nánó k'uéjó sín kjuích'éna sín tí n̄nko i, a ntá jaha ntáchrúa ḱixin iní yaon koá s̄ich'éna ínaá, ichrúa —ichro sín.

* 2:17 Salmo 69.9

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án.

²² Ntá tió kjuixin xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án.

²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni

²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetooan kuènte tí sín Israel.

² A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kixin:

—Maestro, kónoheni kixin It'éni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jíé —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjetōan. Tí nkexro tsokjéhya nixien mé xitjahya ts'ikon tí kjuachaxin ts'etōan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetōan. Jehó tí sín tsíkokjéxín nta la ko kjaxin tsíkokjéxín Nchakuen Dios mé ts'áyéhe sín tí kjuachaxin kuente Dios.

⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a.

⁷ Chrakonhya tí nkehe xrjanca kixin “Kaín chojni t'ichjánxin tsokjíhi nixien.”

⁸ Éxí yóhe tí tinhín tí chjéhe xrjntō ntá noahya nketí kuixín tí xrjntō la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanchankí ch'ín Nicodemo inaá kixin:

—¿Nkekuèté kixin xikaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etōan tí nación Israel ntá naxa tiénxinhya tí nkehe ní?

¹¹ Chaxín tjétjonka tí nkehe nòna la ko tí nkehe k'uikuān ntá títekákonnahya jaha.

¹² Tí nkehe tjétjonka la kuente chjasintajni ó ntá kjónté la títekákonnahya jaha. ¿Ntá nkexrí

chrókuítekáván tí chrótjonka nkehe kuènte nkaya nkajní?

¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixin ch'án.

¹⁴ Éxí yóhe ch'ín Moisés tió k'uixin sín tí nteje, a ntá Dios mé k'uetōan kixin sinchekjanoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkani ch'án ijnko ntacruz

¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochóna sín kjuachón jnkochrín.

Dios imá tjuèhe ch'án tí chojni chjasintajni

¹⁶ Kixin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjányanhya sín tsochóna sín kjuachón jnkochrín.

¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jie kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaá chojni.

¹⁸ 'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitōexín Dios tí ijje sín tsjasóte sín kixin titekakuenhya sín tí jnkokoáxón Xjeen Dios.

* **3:14** Números 21.9

19 Na mé xikaha Dios sinchekjasóte sín jnkochrínín kixin ó kui tí nkexro t'inkaséyanxín chjasintajni na kjónté ntá antsí má tóxrjínhín sín tí sítíe a. A ntá tí t'inkaséyan la náhí kixin naxa tóxrjínhín sín tí nkehe jínahya tjejóch'e sín.

20 Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín.

21 A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsōan sín kixin tjejóch'e sín tí nkehe tóxrjínhín Dios.

Ch'ín Juan Bautista chrónka inaá kuènte ch'ín Jesús

22 Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni.

23 Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá síín. Na ntá nkáki sín kuikite sín.

24 Mé xikaha kónhen naxa kjuák'echjinhya ch'ín Juan.

25 Ntá tí sín k'uájiko ch'ín Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín.

26 A ntá tí sín k'uájiko ch'ín Juan sákjuítsjehe sín ch'án chénka sín ch'án kixin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuènte ch'án, la mé itjen

ch'án t̄ikite ch'án chojni la ko kaín xín chojni mé t̄jichréhe sín ch'án —ichro sín.

27 Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni.

28 Ó kuínhínrá ntoá k'uéxrjanka senó kixin janhya tí Cristo. Náhi. Janhan ó kuítuannuá kuítõnxíán nt̄ia tsoxrjanka kixin ó tsi ch'án.

29 Éxí yóhe ijnko ch'ín tsoṭehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chàna kixin xikaha sítõnhen kixin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án.

30 A ntá jehe ch'án t'ichjánxin antsí ts'etõan ch'án. A ntá janhan la kénhyó —mé chro ch'ín Juan.

Tí nkexro kuixín nkaya nkajní

31 Tí nkexro kuixín nkaya nkajní mé kaín nkehe t'etuenhen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kuixín nkaya nkajní mé kaín nkehe t'etuenhen ch'án.

32 Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án.

33 A ntá jnkojín nkexro titekaon sín tí nkehe chrónka ch'án na mé xikaha tjakõxin ch'án jie kixin chaxín ntoá chrónka Dios

34 kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhi.

³⁵ It'eni Dios mé tjuèhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xín nkehe ts'etuenhen ch'án.

³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kuikite ch'án sín na ntá tí chojni chréhe sín tí ch'ín Juan la kánhyó tsjé sín.

² Kjánchó jehya ch'ín Jesús kuikite ch'án chojni. Méxra tí sín k'uájiko ch'án mé kuikite sín chojni.

³ A ntá tió kónohe ch'ín Jesús kixin xikaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria.

⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José.

⁶ La ó chjino tjen tí tòye takitsje chojni ìnta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrjé ch'án kixin imá kjín tí ntia kjuixín ch'án ntá kjuák'etjajin ch'án chrínta tí tòye takitsje sín ìnta.

⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte

estado Samaria ikui tjan tsakitsje tjan ìnta. Ntá ntáchro tí ch'ín Jesús kixin:

—Chjìna intsi ntà its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuènté kixin jaha ijnko chojni judío mé chrókjuanchana ntà kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsōan jaha nkexro tí tjetjanchaha ntà ntá chrókjuanchana ntà, ntá chrótjaha tí ntà tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakitsjeyá ntà kixin tí tòye i la imá ninka? ¿Ntá nkexrí tsochjina tí ntà tjechón tjimé?

¹² Tí nkexro k'uaxrjeníxinni mé Jacob mé kuítóeheni tí tòye tjiá ntà ntihi la ko kjaxin ik'uí ch'án tí ntà la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetōan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kixin:

—Tí sín it'i sín tí ntà ntihi tí tòye i nántaxón its'en sín ntà inaá.

¹⁴ A ntá tí sín its'i sín tí ntà sintakitonhan sín mé í ts'enhya sín ntà inaá. Tí ntà sintakitonhan sín mé ts'óna éxí yóhe ijnko ntà ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

¹⁵ Ntá ntáchro tí tjan a ínaá kixin:
—Chjìna tí ntá, a ntá ts'énhyana ntá ínaá la ko ts'inkahya ntihi tsakítsje ntá —ichro tjan.

¹⁶ Ntá k'ueṭoan ch'ín Jesús kixin:
—Sátjia tjík'iyehé xiá ntá ts'inkará ntihi ínaá —ichro ch'án.

¹⁷ Ntá ntáchro tjan kixin:
—Chontahya xiná —ichro tjan.

Ntá ntáchro ch'ín Jesús kixin:
—Chaxín ntáchrua kixin chontahya jaha xiá.

¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:
—T'íkuan kixin jaha ijnko nkexro chrónka itén Dios.

²⁰ A ntá tí sín k'uaxrjeníxinni k'uúxin ósé mé k'uéxraxinkakonxín sín Dios tí jna ntihi. Kjánchó jahará chojni judío mé ntáchorá kixin tí njnko jie chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:
—Títekávan kixin tjetsi tí hora a tsoxráxinkákonxínhyará It'eni Dios tí jna ntihi la ko tsoxráxinkákonxínhyará ch'án chjasin Jerusalén kjaxin.

²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjìnhin chojni tí jie yámá sín mé ts'axrjeníxin tí sín judío.

²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín

It'éni la mé asén sín ó tsoxraxinkakonxín sín It'éni Dios. Dios mé tóxrjínhjn ch'án kixin chojni xikaha chrókjuich'e sín chróxraxinkakonxín sín ch'án.

²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uíkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuèté nixjehe ch'án tí tjan a.

²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókókehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús.

³¹ Naxa tihya sín nachrohe tí sín k'uájiko ch'án mé chrónóehē sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

33 A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkojín sín tsíkikao sín nkehe kjóne ch'án?
—ichro sín.

34 Kjánchó ntáchro ch'ín Jesús kixin:

—Éxí yóhe chrókjoné nkehe mé tí sit'a tí xra la ko tsjixinna tí xra kuènte tí nkexro chr'ánna k'uinka.

35 Ntáchrorá kixin: “Noó nitjó naxa t'itjayan tsochónhenni ntá tsotjani noatrigó”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jína chrótjani.

36 Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenka sín nonte la ko tí sín tjá sín jnkokón tsochéhe sín.

37 Mé xikaha tsoxiteyá tí nkehe ntáchro sín kixin: “Ijngo nkexro mé t'enka noa, a ntá ókjé sín tsotjá sín tí noa a”, ichro sín.

38 A ntá janhan ichr'an tí jahará tsotjará ijngo nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

39 A ntá itsjé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xikaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a.

40 A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehé sín ch'án kixin tsitöhe ch'án ntiha. Ntá kuítóhe ch'án ntiha iyó yaon.

41 Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án.

42 Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhi. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohe jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea.

⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án.

⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehya sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjainca ch'án tí nta tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum.

⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehya ch'án tí ch'ín Jesús kixin sáchrókjui ch'ín Jesús ntøe ch'án sinchekitohe jína tí xjeen ch'án ó tjet'en xjan.

⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónòe tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuini ntõna jaí kixin xjanna ó tjet'en? —ichro tí ch'ín a.

⁵⁰ Ntá kjuátẽhe ch'ín Jesús ntáchro ch'án kixin:

—Ikjan sátjia ntõa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án.

⁵¹ A ntá kjuíji ch'án chjino ntõe ch'án ntá xrínahya tí sín ch'ehe sín ch'án xra kjuíxinhin sín ntjia chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankixin kuítóhe xjan jína, na ntá chrónka sín kixin:

—Ijna la una kónjín mé kjuìn tí sóa —ichro sín.

⁵³ Ntá kónohe tí it'é xjan kixin xikaha tí hora tsíntáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntõe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tíó kuixin ch'án estado Judea ikjan ch'án estado Galilea.

5

Ch'ín Jesús kjuínchekitõhe jína ijnko ch'ín tsík'en tõte chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén ínaá.

² A ntá ntaha chjino tí ntõja t'ixenxín kolélo chjasin mé tjen ijnko pila tóxyoyéya ntã mé nkiva hebreo tí ntã mé it'in Betesda. A ntá chrínta tí pila siín in'ó cuarto ntsíntsí.

³ Ntaha tjejótsínka nchónhya chojni níhi, iso sín t'íkonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí nta

⁴ kixin nántaxón k'uínkajin ijnko ángel kjuiánki nta kjuínchekinkí nta. A ntá tí nkexro senó tsjiánki nta mé tsitohe jína kjónté cualquiera chin chóna.

⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án.

⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitohe jína? —ichro ch'án.

⁷ Ntá ntáchro tí sinníhi kixin:

—Chóntahyani ninkexró tsjinkitsani tsjiánkíni nta. A ntá tí tjinkaonni chrókjuiánkíni nta la ntá ókjé nkexro tjitaón ntia tjiánki nta senó —mé chro tí sinníhi.

⁸ A ntá k'ueṭoan ch'ín Jesús kixin:

—Ijie la t'inkatjen, tjatsíyan kaniāa, itjia —ichro ch'án.

⁹ Ntá tuénxín kuítóhe ch'án jína, ntá kjuatsen ch'án kaniēe ch'án kjuankíxin itji ch'án. Kjánchó yaon sábadó tíha mé tí yaon t'ok'éhe sín.

¹⁰ Mé xíkaha tí sín judío ntáche sín tí ch'ín kuítóhe jína kixin:

—Ijie tí yaon t'ok'éheni ntá kohya kjuachaxin tsamá kaniāa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitona jína mé k'ueṭuanna kixin tsjatsíyan kaniāna la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetuanhan kixin tsjatsíyan kaniaa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitohe ch'án jína kixin ntaha la siín nchónhya chojni, a ntá ntahó k'uitjáyanxín ch'ín Jesús.

¹⁴ A ntá chr'éxin ch'ín Jesús xeta ch'án tí ch'ín a nkaxenhen tí nínko jié ntá ntáchro ch'án kixin:

—Tsjehe kixin ijie la ó jína tjen jaha la í tjásinhya jié inaá. A ntá tí tsjásian jié inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekitohe ch'án jína.

¹⁶ Mé xikaha tí sín judío kjuankixin sín chónkíhi sín tí ch'ín Jesús la ko chrók'óyán sín ch'án kixin kjuínchekitohe ch'án chojni jína tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha tí sín judío antsí tjinkaon sín chrók'óyán sín ch'án kixin kuítekakuenhya ch'án tí ley kuente tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'ín Jesús tí jehe sín kixin:

—Ijnko nkehe tjetoan tsotjonkará kixin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án.

20 A ntá tí It'é mé tjuèhe tí Xjeen ch'án, la ko tjakohé ch'án kaín xín xra ch'e ch'án, la ko antsí tjetóan tí xra naxa tsjakohé ch'án kixin ntá tsochakonrá kixin ts'ikonrá tí xra sich'e ch'án.

21 Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án.

22 A ntá It'é la í sinchekitoexínhya ch'án ijíé ninkexró. Kaín tí kjuachaxin kuènte ch'án chjéhe ch'án tí Xjeen kixin sinchekitoexín ch'án ijíé chojni chjasintajni

23 kixin ntá kaín chojni tsjikosáyehe sín tí Xjeen éxí yóhe tjikosáyehe sín tí It'é ch'án. Tí sín tjikosáyehya tí Xjeen xikaha kjaxin tjikosáyehya sín tí It'é kixin jehe ch'án mé tsíchr'án tí Xjeen.

24 'Ijnko nkehe tjetóan tsotjonkará kixin tí jnkoinrá tjejotinhínra tí nkehe tjákua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahyará, na mé kuitohérá tí ntja chrók'uénxinrá, la ntá jie kjuankixinrá tsochontará tí kjuachón jnkochrín.

25 Ijnko nkehe tjetóan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín.

26 Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón

27 la ko kjaxin chjéhe ch'án kjuachaxin tí Xjeen ch'án sinchekitoexín tí ijíé chojni chjasintajni kixin

jehe mé tí Xjeen Dios K'óna Chojni.

²⁸ Chrakonhyará tjétjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án.

²⁹ A ntá ts'axrjexín sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

³⁰ 'Tí jehó kjuachaxin kuèntana xitjahya sít'a ninkehó xra. A ntá jie ntakitoaxián tí ijie éxi k'uetuanna T'aná. A ntá tí nkehe ntakitoaxián la jína ntoá kixin tjínkaKonhya sít'a éxi tjínkavan. Náhi. Éxi tjinkaon T'aná, tí nkexro ichr'ánna, mé xikaha tjét'a.

³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya.

³² Itjen í jnko nkexro tjechrónka nkexrí tjén janhan a ntá ó nòna kixin tí nkehe chrónka ch'án la sínki.

³³ Jahará tsíkétuènhénra chojni kjuíkjanchankíhi sín tí ch'in Juan kixin nkexrínchi tjén janhan. A ntá tí nkehe tsíkjatèhe ch'án la chaxín ntoá tiha.

³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jína chrókuáará.

³⁵ Tí ch'in Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanrá tí xrohi a.

³⁶ Kjánchó siin nkehe antsí tjetoan tjakoxin nkexrí tjén janhan, a ntá kánhyó tjetoan tí nkehe tsíchrónka tí ch'in Juan. Tí xra tjét'a, mé tí xra

kjuanjon T'aná sít'a tsjixinna tí xra, na mé tíha mé tjakoxin kixin chaxín T'aná tsíchr'án k'uinka.

³⁷ Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uikonhyará ch'án

³⁸ la ko kjaxin itén ch'án kuítóehya nkaya kjará kixin tjinkákonhyará tsítekáonrá tí Xjeen Dios tsíchr'án tsíki.

³⁹ Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuènte janhan.

⁴⁰ Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

⁴¹ 'Janhan na tjéyáhya kixin chojni chrókjuikosáyana sín.

⁴² A ntá janhan ó nòna kixin jahará la tjuèhyará Dios.

⁴³ Mé k'uinkaxian janhan tí kjuachaxin kuènte T'aná. Kjánchó jahará la títekáonnahará. A ntá tí chrókui í jnko nkexro kjuachaxin chrókuakitsjeníxin asén ó, a ntá tíha mé tjinkáonrá chrókuítekáonhénrá.

⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoá Dios?

⁴⁵ Tsontáchróhyará kixin janhan tsjánchíá jie tí jahará nkayakon T'aná. Náhi. Ch'ín Moisés mé tsjanchia ch'án jie tí jahará kixin tsontáchrórá kixin jehe ch'án kuinkachónkirá.

⁴⁶ Kja tí jahará chrókuítekáonrá nkehe tsíntáchro ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuènte tí janhan.

⁴⁷ A ntá tí títekákonhyará tí nkehe tsíkjin ch'án, ¿ntá nkexrí chrókuítekákonnará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

¹ A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha.

² A ntá nchónhya chojni tinkáchréhe sín kixin k'uíkon sín tí kjuaxroan jié kjuasin ch'án kjuínchekitohe ch'án jína tí sinnedi.

³ A ntá jehe tí ch'ín Jesús chriin ch'án ijnko jna na ntá ntaha kjuák'etjxin ch'án la koí tí sín k'uájiko ch'án a.

⁴ A ntá í séhya ts'ixin tí kia pascua a mé kié tí sín judío a.

⁵ A ntá tí ch'ín Jesús k'uíkon ch'án kixin nchónhya chojni chriin sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uenani nkehe sine kaín tí chojni a? —ichro ch'án.

⁶ Mé xikaha ntáchro ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án.

⁷ Ntá kjuátehe ch'ín Felipe ntáchro ch'án kixin:

—Kjonté doscientos chichaon denario chróchóntani chrók'uínáxin tí niotja la naxa

chrókjuachahya chrók'uáyéhe jnkojnko sín tot'ò tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹ —Ntihi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchro ch'ín Jesús kixin:

—Tétuēhén tí sín siín a kixin ts'ixitjāxīn sín —ichro ch'án.

A ntá nchónhya ika yoa siín na ntá ntaha k'uixitjāxīn sín na mé éxí in'ó mil chojni k'uixin sín.

¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxiḱayēhe sín chjéhe sín kaín tí sín sítjāxīn a. Xikaha kjāxīn k'óxiḱayēhe sín tí koche. A ntá kaín sín kjóne sín éxí tjinkaon sín.

¹² Kjuixin kjóne sín ntá k'uetuēhen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'ò síxèhe sín kixin ts'itjáyanhya ninkehó —ichro ch'án.

¹³ Ntá xikaha jehe sín kjuenájín sín kjuínchekaón sín teyó ntaxra tí tot'ò tí in'ó niotja tsík'óna noa cebada síxèhe sín tí kjuixin tsíkjine sín.

¹⁴ A ntá tí sín kjóne tí niotja k'uikon sín tí kjuaxroan jíe kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakohēni ch'án —ichro sín.

15 Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhén sín ch'án tí xra rey kixin chrók'ueṭoan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

Éxí ijnko ntia xikaha kjuítaón ch'ín Jesús tí ntayaon

(Mt. 14.22-27; Mr. 6.45-52)

16 A ntá ó kóntó ntá tí sín k'uájiko ch'ín Jesús k'uínkajinxin sín jna sákjuí sín chrínta ntayaon

17 k'ujit'ótjen sín ijnko ntabárcṵ kjuankíxin sín ts'atòye sín ntayaon sátsji sín chjasin Capernaum. Na ó k'uíxin tie na naxa kjanhya ch'ín Jesús.

18 Ntá kjuankíxin chjéhe xrintṵ tsanká ntá kjuankíxin tinkákjaminkí ntá.

19 A ntá tíó kjuacha sín á in'ó ṵ injon kilómetro ntá xrinahya k'uíkon sín tí ch'ín Jesús tinkákóchjinehe ch'án tí ntabárcṵ, éxí ijnko ntia tjetjitaón ch'án tí ntá, ntá k'uíkon sín ntá imá chrakon sín.

20 Kjánchó ntáchro ch'án kixin:

—Janhan tíha. Chrakonhyará —ichro ch'án.

21 Ntá imá chéhe sín k'ujit'ótjen ch'án tí ntabárcṵ. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

22 A ntá tí yaon chr'éxin na mé tí sín kuítóhe tóhe ntayaon na mé ó nohe sín kixin jnkokoáxón ntabárcṵ k'uékjak'e ntiha la ko ó nohe sín kixin ch'ín Jesús kjá ni sátsíkjikohya sín ch'án na mé k'uíkon sín kixin jehó tí sín k'uájiko ch'án sátsíkji sín.

23 Kjánchó siín ntabárcō tixín chjasin Tiberias tinkákóchjinehe tí nó kjónexín sín tí niot̄jā kjuanchaxín ch'ín Jesús kjuasáyé Dios.

24 A ntá tió k'uíkon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcō ntá sákjuí sín chjasin Capernaum sákjuíkjoyá sín tí ch'ín Jesús.

Inchéni Jesús mé éxí niot̄jā tjanjon kjuachón

25 A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro sín.

26 Ntá kjuátēhe ch'ín Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niot̄jā kókjahará, la jehya kixin kiénxinrá tí kjuaxroan kjuásian.

27 Chrókjuiç'héhyará tí xra chrók'uite tí nkehe chrókjónterá tjoka tsjeje ó. Náhi. Chrókjueyará tí nkehe chrókjuejehya chrókjónterá chrók'uayéxínrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakoxín ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

28 A ntá kjuanchankíhi sín ch'án kixin:

—¿Nkexrí chrókjuiç'eni chrokuinchexiteyáni nkexrí tjinkaon Dios? —ichro sín.

29 A ntá kjuátēhe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

30 Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha?

31 Tí sín tsík'axrjeníxinni k'uéjó sín ósé mé kjóne sín maná k'óna niotja tió k'uíxin sín nteje mé xikaha tí xroon kuente Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”^{*} —ichro sín.

32 A ntá kjuátehe ch'ín Jesús ntáchro ch'án kixin:

—Ijnko nkehe tjetjanon tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jina k'uínkajinxin nkaya nkajní.

33 Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

34 Na ntá kjuanchia sín kixin:

—Jaha Ìnchéni, jnkochrín chjehéni tí niotja a —ichro sín.

35 A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

36 Kjánchó éxí k'uétjonkará senó na ó k'uíkonrá tí janhan na kjónté naxa títekákonhyará.

37 A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanyha sín kixin sátsji sín.

38 Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjinhin tí nkexro tsíchr'ánna.

* 6:31 Salmo 78.24

39 **A** ntá T'aná mé tí nkexro tsíchr'ánna mé tjinkaon ch'án kixin s̄intak'itjáyanhya ninkexró tí sín chjìna ch'án na mé tjinkaon ch'án kixin janhan mé s̄intaxechón kaín sín tí yaon tsjixixín.

40 Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. **A** ntá janhan s̄intaxechón sín tí yaon tsjixixín —ichro ch'án.

41 **A** ntá tí sín judío kjuankixin sín kjonta sín tí ch'ín Jesús kixin tsíntáchro ch'án kixin jehe ch'án mé tí niotja k'uínkajinxin nkaya nkajní.

42 Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuènté ntáchro ch'án kixin nkajní k'uínkajinxin ch'án? —ichro sín.

43 Ntá kjuátēhe ch'ín Jesús ntáchro ch'án kixin:

—Tjtoherá tjóntahyará tí janhan.

44 Kohya nkexro chrókóchjina tí tjén janhan tí chrókjuínkítsahya T'aná. **A** ntá tí sín tóchjina na mé s̄intaxechón sín tí yaon tsjixixín.

45 Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”† **A** ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

46 'Jehya kixin itjen ijnko chojni tsík'ikon T'aná. Náhí. Jehó tí nkexro kujxin tí tjen Dios mé tsík'ikon ch'án Dios.

† 6:45 Isaías 54.13

47 Chaxín tí nkehe tjéxrjanka ḱixin tí sín titekaon sín tí janhan mé ó tsochónta sín kjuachón jnkochŕín.

48 Janhan na mé tí niotja tjanjon kjuachón.

49 Tí sín k'uaxrjeníxinrá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uítjáyan sín.

50 Tí nkehe xrjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín.

51 Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochŕín. Tí niotja tsánjuan ts'ejóchónxin chojni chjasintajni mé ntóna tíha —ichro ch'ín Jesús.

52 A ntá tí sín judío mé sítjité sín itjo sín kichó sín ntáchro sín ḱixin:

—¿Nkexrí chrókjuanjon ch'án ntøe ch'án chrókóneni? —ichro sín.

53 A ntá kjuátehe ch'ín Jesús ntáchro ch'án ḱixin:

—Ntá tsotjonkará ḱixin tí sintehyará ntøe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará.

54 Tí sinterá ntóna la ko it'irá jnina ntá tsochontará kjuachón jnkochŕín la ko janhan mé sintaxechónrá tí yaon tsjixixín.

55 Ḱixin ntóna na mé chaxín nkehe ine chojni la ko jnina na mé chaxín nkehe it'i chojni.

56 Tí sín ine ntóna la ko it'i sín jnina mé jnkokoá tjenkayáxinkian sín la ko janhan mé xríkian sín.

57 T'aná tsíchr'án ch'án tí janhan mé chóna kjuachaxin, a ntá janhan mé tjéchonxian tí jehe

ch'án. Ntá tí sín sine tí ntóna mé ts'ejóchónxin sín tí janhan.

⁵⁸ A ntá tjéníxja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjeníxinrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejochónrá jnkochrín —mé chro ch'ín Jesús.

⁵⁹ Kaín tíha mé kjuakohe ch'án tí sín tsíkójnkotséxin tí nínko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kixin xikaha tóxakonhen sín kíenxínhya sín tí nkehe tsíntáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi?

⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé?

⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuènte tí Nchakuen Dios na mé tjejóchónxin chojni.

⁶⁴ Kjánchó isorá naxa títekákonnahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhya

sín ch'án la ko kónohe ch'án kixin nkexro sinchekji ch'án.

⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkĩtsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrínahya kuítóhe sín, í chrèhya sín ch'án.

⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Ìnchéni, ¿nkekuènté tjanchankíhíni á sáchrókjuini ókjé? Jaha tí tan chronka a mé tsochóntaxínni kjuachón jnkochrín

⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkojínrá ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeyá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'ín Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án.

² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kíchó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian.

⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni siín chjasintajni —mé chro sín.

⁵ Xikaha ntáchro tí sín kíchó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan.

⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín.

⁸ Jahará la sátjirá tí kia a. A ntá janhan la tjíhya kixin naxa kjuixrakáhya tí hora kuèntana —ichro ch'án.

⁹ Mé xikaha ntáchro ch'án ntá kuitohe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kíchó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án.

* 7:2 Levítico 23.34

11 A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

12 A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyeye ch'án chojni”, ichro sín.

13 Kjánchó noxínhya kjo sín xikaha kixin chrakonhen sín tí sín judío a.

14 A ntá ó kjuíji jnkosiné tí kia a ntá k'uixenhen ch'ín Jesús tí nínko jié ntá kjuankixin ch'án kjuako ch'án.

15 A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakoehya ch'án? —ichro sín.

16 Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexro tsíchr'ánna k'uinka.

17 Tí jnkoinrá tjínkaonrá chrókjuínchexiteyéhérá éxí tóxrjínhin Dios la tsonohará á chaxín kuènte Dios tí nkehe tjákua o á kuèntana tíha.

18 A ntá tí nkexro tjako tí nkehe t'axrjeníxin kja sín ó mé xikaha ch'e kixin tjínkaon sín kixin tí chojni ó mé chróchóntehe sín ch'án kjuasáya. A ntá tí nkexro tjínkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

19 '¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra

nkekuèté tjinkáonrá chrók'oyánrá tí janhan?
—ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.†

²² A ntá ch'ín Moisés tsík'etoan kixin xjaanrá ntoa itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjeníxinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni.

²³ A ntá xikaha nchekará xjan xroye tí yaon t'ok'éheni kixin xikaha chrókjuinçek'itjáyaníhyará ninkehó tí nkehe k'uetóan ch'ín Moisés, ¿ntá nkekuèté kixin ninkákonará tí janhan kixin kjuintakitoḥa jína ijnko chojni tí yaon t'ok'éheni?

²⁴ Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínḥin Dios —mé chro ch'ín Jesús.

Ch'ín Jesús chrónka kixin nketí k'uaxrjeníxin ch'án

²⁵ A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín?

²⁶ Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha.

† 7:21 Juan 5.2-9

27 Kjánchó ó noheni nketí tsíkjixín ch'án. A ntá tió tsi tí nkexro Cristo ntá ninkexró tsonoehya nketí tsixín ch'án —ichro sín.

28 A ntá ch'ín Jesús kjuák'ekjako ch'án tí ninko jié ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a.

29 Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

30 Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxa kjuanjonhya Dios kjuachaxin chrótsé sín ch'án.

31 Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

32 A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchat'á t'etoan k'uetuenhen sín iso sín policia kuénte ninko tsotsé sín ch'án tsjak'echjina sín ch'án.

33 A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna.

³⁴ A ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankíxin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kixin ntá tsjakohé ch'án tí sín griego?

³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojinrá ik'uénrá nta xrákirá its'irá nta.

³⁸ A ntá éxí ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje ìnta tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sátiyhya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuènté chrókjuixìn Galilea tí nkexro Cristo?

⁴² Tí xroon tsíkjin sín ósé mé chrónka kixin tí nkexro Cristo mé ts'axrjeníxin tí sín k'uaxrjeníxin tí ch'ín rey David la ko tsjixìn ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kaín sín kixin nkexro tí ch'ín Jesús.

⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuènte nínko mé kjan sín tí tjejó tí sín fariseo la ko tí sín nchät'á t'etöan. Ntá tí sín a mé kjuanchankíhi sín tí sín policia kixin:

—¿Nkekuènté kjuíkoahyará ch'án? —ichro sín.

⁴⁶ Ntá kjuátēhe tí sín policia kixin:

—Kohya ninkexró nixja éxí xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kuítóhérá kjuít'ayahará ch'án?

⁴⁸ ¿Á kuítekaon tí jehe ch'án jnkojín tí sín t'etöan kuènténi o tí sín fariseo?

⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuènténi la kohya kjuachaxin sinchekjasóteni ijnko chojni tí naxa kíenhyani nkehe nixja

ch'án la ko kienhyani tí jię kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuixian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkji_xinhya sín tí estado Galilea —ichro sín.

Ijnko tjan kjuasin jię chóna ókjé chojni ntoa

⁵³ Ntá jnkoinjko tí sín xíka sín sákjuí sín ntōe sín.

8

¹ Ntá ch'ín Jesús mé sákjuí ch'án tí jna Olivo.

² Ntá tí kóyaon nchítjen ikjan ch'án k'uixenhen ch'án tí ninko jié a la ko kaín xín tí chojni mé kóchjinehe sín ch'án. Ntá kjuák'etj_xin ch'án kjuankixin ch'án kjuako ch'án.

³ Ntá tí sín tjako tí ley la ko tí sín fariseo mé kjuikao sín injnko tjachjin kónoxixin kixin chóna tjan ókjé chojni ntoa. Ntá kjuak'e sín tjan jnkosiné tí sín tjejó ntiha.

⁴ Ntá ntáche sín tí ch'ín Jesús kixin:

—Maestro, tí tjan i kónoxixin kixin kjuasin tjan jię chóna tjan ókjé chojni ntoa.

⁵ ¿A ntá tí ley tsíkjin ch'ín Moisés mé t'etōan kixin ixrō chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kixin tjinkaon sín kixin ách'e ntoáhya chrókjuátehe ch'ín Jesús ntá chrókjuanchia sín jię. Ntá ch'ín Jesús mé k'uisén ch'án kjinxin ch'án dedo tja ch'án nonte a.

⁷ Ntá naxā tinkákjanchankíhi sín ch'án. Ntá k'uínkatjen ch'án k'uētōan ch'án kixin:

—Xá nkexro tí tjejórá ntihi chóntahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá.

⁹ Ntá tí sín a mé kuínhin sín tí nkehe k'uetōan ch'ín Jesús ntá kósuèhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha.

¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Inchéni, ninkexró —ichro tjan.

Ntá ntáchro ch'ín Jesús kixin:

—Kjaxin janhan sintakjasótiahya. Sátjia la í tjásinhyá jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhyá tíha kixin jahvá tjechronka —ichro sín.

¹⁴ Ntá kjuátēhe ch'ín Jesús ntáchro ch'án kixin:

—Janhván tjétjonkará nkexrí tjén na kjónté chaxín xrjanka kixin ó nòna nketí nó k'uinkaxian

la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá.

¹⁵ Jahará la éxí chojni chjasintajni ó tékará jie. A ntá janhan la tékahya jie ninkexró.

¹⁶ Kjánchó ntoá chrókjuintakitoaxián ijié chojni kixin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxíinkian ijié chojni.

¹⁷ A ntá tí ley tsíkjin ch'in Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni.

¹⁸ Ntá janhan na mé tjéxrjanka nkexrí tjén janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjén janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'in Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xikaha chro ch'in Jesús tí kjuák'ekjakoxin ch'án tí ninko jie chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'in Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijiará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjéníxinrá. A ntá janhan la nkaya nkajní k'uaxrjéníxian. Jahará la kuènte chjasintajni ntihi. A ntá janhan la janhya kuènte chjasintajni.

²⁴ Mé xikaha tjonkará kixin tió ts'énrá naxa tsochontará ijíará kixin tí tsítekákonhyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijíará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankíxixín kjuankíxian tjonkará kixin nkexro tí janhan.

²⁶ Itsjé nkehe chonta chróntáxrjan kixin chrókjuintakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhan chrónka ch'án mé tjáqoha tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní.

²⁸ A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétōan tí xra tjét'a. Náhí. Jehó tí nkehe kjuakona T'aná mé tjét'ákua.

* 8:24 Éxodo 3.14 † 8:28 Éxodo 3.14

29 Tjékian tí nkexro k'uetuanna k'uinka kixin jehí xráxín T'aná la kuítónahya janhván kixin xráxín ntaxiteyáha tí nkehe tóxrjnhin ch'án —ichro ch'án.

30 Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijié sín

31 Ntá nixjehe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsítóehyará tí tan kjuákoHará ntá jahará chaxín discípulo kuéntana

32 la ko tsjátsoanrá tí nkehe chaxín, la ko tí nkehe chaxín mé tsojtáhará kjuachaxin tsaáxinrá, a ntá tsokohya nkehe ts'inkákonhen —ichro ch'án.

33 Ntá kjuátehe sín ntáchro sín kixin:

—Jeheni mé tsík'axrjeníxinni ch'ín Abraham na í xráxín kohya nkexro k'uena tí jeheni. ¿Nkekuènté ntáchrua jaha kixin ts'áyéheni kjuachaxin tsaáxinni? —ichro sín.

34 Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jie mé éxí chojni k'uíná chrokjuahya tsítóhe sín ijié sín.

35 A ntá ijnko chojni k'uíná la jnkochrínhya tsjak'e ch'án tí ntoe tí nkexro a. A ntá tí xjeen tí nkexro na mé jnkochrín tsítóhe ntiha.

36 Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhen.

37 Ó nòna kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhán kixin títekákonhyará tí nkehe tjéxrjanka.

³⁸ Janhan xrjanka tí nkehe k'uíquān ḱixin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

³⁹ A ntá jehe sín kjuátehe sín ntáchro sín ḱixin:

—It'éni mé ch'ín Abraham —ichro sín.

Kjánchó ntáchro ch'ín Jesús ḱixin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuích'e ch'án.

⁴⁰ A ntá tjetjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án.

⁴¹ Jahará tjejoch'erá éxí kjuích'e it'ará —ichro ch'án.

Ntá ntáchro sín ḱixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín ḱixin:

—Tí chrókóchaxín ḱixin Dios mé It'ará la ntá chrótjuanará ḱixin janhan kjaxin k'uaxrjeníxinna Dios k'uinkaxian tí tjen ch'án. Jehya ḱixin janhván k'uinka. Náhí. Dios mé ichr'ánna k'uinka.

⁴³ ¿Nkekuènté ḱixin tiénxinhyará tí nkehe tjonkará? Jehí tjinkákonhyará chrókuinhínrá tí nkehe xrjanka.

⁴⁴ Jahará mé xjeen Tsochren la ko jahará tsík'axrjeníxinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankíxixín kjuaya ch'án. Nunca k'uénixja ch'án ntoá. Xrácín ch'ia ch'án ḱixin xikahó tjenkayáxin ch'án. Jehe ch'án mé it'é káin tí kjuach'ia.

⁴⁵ A ntá janhan tjetjonkará nkehe ntoá ntá títekákonnahyará.

46 ¿Á tjeorá jnkojínra nohará nkerí jię kjuásian janhan? A ntá tí ntáxrjan tí nkehe ntoá, ¿ntá nkekuèté títekákonnahyará?

47 Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkachónkihyará Dios ntá tjinkákonhyará chrókuinhínra itén ch'án —ichro ch'ín Jesús.

Cristo la ó xráxín tjen ntá chr'éxín kjuák'e ch'ín Abraham

48 A ntá tí sín judío ntáche sín tí ch'ín Jesús kixin: —Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

49 Ntá kjuátęhe ch'ín Jesús ntáchro ch'án kixin: —Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan.

50 Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jię tí sín kuítekakonhya.

51 Imá tjeoan tí nkehe tjétjonkará kixin tí tsítékáonra tí nkehe tjákua la í ts'énhyará —ichro ch'án.

52 Ntá kjuátęhe tí sín judío ntáchro sín kixin: —Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchronka itén Dios ósé la mé ik'uén sín. Ntá jaha ntáchrua kixin tí tsitekaonni tí nkehe tjákua jaha ntá í ts'enhvani, ichrua.

53 ¿Xá imá tjeoan jaha la ntá kánhyó t'etoan it'éni Abraham? Jehe ch'án la ik'uén ch'án la ko kjaxin

ik'uéén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosàyana ch'án na ntá jahará ntáchrorá kixin jehe ch'án mé Dios kuèntará.

⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyona tí jahará chrókjuít'ayahará. Kjánchó janhan na choxian ch'án la ko ntaxiteyáha tí nkehe t'etoan ch'án.

⁵⁶ Ch'ín Abraham tí nkexro tsík'axrjeníxinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuèté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetóan tí nkehe tjétjonkará kixin naxa kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitohe jína ijnko ch'ín tsíkokjéxín t'ikonhya ch'án

¹ K'uátsínka sín ijnko ntia ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án.

² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjíexín ch'án t'ikonhya ch'án? ¿Á ijíé it'é o ìné ch'án o á ijíé ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijíé ch'án la ko jehya ijíé it'é la ko ìné ch'an. Náhí. Jehí xíkaha tsíkonhen ch'án kixin tí kjuachaxién Dios tsjakoxin kixin tsitoxin ch'án jína.

⁴ Naxa nchakotjin t'ichjánxin sit'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra.

⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kujukite ch'án ntaten ch'án intsí nche k'óna nchet'o ntá kuátematóxin ch'án ikon tí ch'ín t'ikonhya.

⁷ Ntá k'uetuenhen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnié Siloé mé t'axrjexín nkívee sín kixin K'uítuenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án.

⁸ Ntá tí sín ntøe chjinaxón ntøe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxin ch'án k'uékjanhak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhi, jehya jehe ch'án. Tóyóhó ch'án tí ch'ín a
—ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'íkuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án
nchet'o kuátematóxin ch'án kuan la ntá k'uetuanna
ch'án kixin satsjia ti pila tjiá ntá nchek'in sín Siloé
ts'ontia kuan, ichro ch'án. Ntá sákjuia k'ontia, ntá
xrínahya ó k'uíkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

*Tí sín fariseo tjanchankíhi sín tí ch'ín
k'uék'ikonhya kuítóhe jína*

¹³ Ntá tí sín a sákjuíko sín tí ch'ín k'uék'ikonhya
sákjuíchréhe sín tí sín fariseo a.

¹⁴ **A** ntá tí yaon t'ok'éhe sín mé tsíkjich'éna
ch'ín Jesús tí nchet'o kjuínchekitoxín jína tí ch'ín
k'uék'ikonhya.

¹⁵ **A** ntá tí sín fariseo xíkjanhankíhi sín ch'án inaá
kixin nkexrí kuítóhe ch'án jína t'ikon ch'án jie. Ntá
kjuátehe ch'án ntáchro ch'án kixin:

—Kuátematóxin ch'án nchet'o kuan, ntá k'ontia
kuan ntá jie t'íkuan —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuente Dios kixin chóntahya
ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jié tí chóna ch'án jie? —ichro sín.

Mé xikaha jnkokónhya kjuenkayáxin tí jehe sín.

¹⁷ Ntá xíkjanckhíkhi sín tí ch'ín k'uék'ikonhya ínaá kixin:

—¿Ntá jaha nkechrúa nkexro tíha tí nkexro kjuíntak'ikuan? —ichro sín.

Ntá kjuátēhe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítékakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyēhe sín tí it'é la ko tí ìné tí ch'ín tsíkitohe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkókjéxín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátēhe tí it'é la ko tí ìné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjíxín ch'án t'ikonhya ch'án.

²¹ Kjánchó noehyani nkexrí kixin t'ikon ch'án jie la ko noehyani nkexro kjuínckhíktohe ch'án jína. Tjanckhíkíhírá ch'án, ó ntēto ch'án, ntá jehe ch'án tsochrónka ch'án kixin nkexrí kuítōhe ch'án jína —ichro sín.

²² Mé xikaha kjuátēhe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen ninko tí sín titekaon kixin ch'ín Jesús mé tí nkexro Cristo.

²³ Mé xikaha ntáchro tí it'é la ko tí ìné ch'án kixin chrókjuanchankíhi sín ch'án, ó ntēto ch'án, ichro sín.

24 Ntá yóxin xík'íyehē tí sín judío tí ch'ín k'uék'ikonhya ntá k'uetuēnhen sín ch'án kixin:

—Tjetsjehe Dios ntá ntoá chonka kixin ó noheni kixin tí ch'ín a na chóna ch'an jie —ichro sín.

25 Ntá tí ch'ín k'uék'ikonhya kjuátēhe ch'án kixin:

—Nonahya á chóna ch'án jie o á chónahya ch'án jie. Jnkokoá nkehe nóna kixin senó k'uék'ikonhya ntá jie t'íkuan —ichro ch'án.

26 Ntá xíkjanckíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

27 Ntá kjuátēhe ch'án ntáchro ch'án kixin:

—Ó kjuixin tjonkará kjánchó titekákonhyará. ¿Nkekuènté tjinkáonrá kixin tsotjonkará inaá? ¿Á kjaxinrá tjinkáonrá tsochréhérá ch'án? —ichro ch'án.

28 Ntá kónínkakohenen sín ch'án la k'uántaxínhin sín ch'án la ko kjuátēhe sín kixin:

—Jaha la chréhé tí chojni a. A ntá jeheni na chréhēni tí nkehe k'uetōan ch'ín Moisés.

29 Ó noheni kixin Dios k'uénixjehē ch'ín Moisés. A ntá tí ch'ín a la noehyani nketí tsíkjixin ch'án —ichro sín.

30 Ntá kjuátēhe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. A ntá jahará ntáchrórá kixin noahyará nketí tsíkjixin ch'án.

31 Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyēhe sín tí nkehe tjinkaon ch'án.

32 Nunca kienhyéni kixin ijnko nkexro chrókjuinçek'ikon ijnko chojni tsíkokjíexín t'ikonhya.

33 A ntá tí nkexro a tí chrókjuixinhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

34 Ntá kjuátēhe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjexín ch'án tí n̄inko a sátsji ch'án.

Ntakótán nchakuen sín

35 Ntá kuínhin ch'ín Jesús kixin xikaha k'uetuēhen tí sín judío kixin ts'axrjexín n̄inko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

36 Ntá kjuátēhe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

37 Ntá kjuátēhe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

38 Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

39 Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uejón taxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jie. Kjánchó ntáchrórá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjetóan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé.

² A ntá tí nkexro t'ixenxín tí puerta na mé nkexro t'ayakonhen tí kolélo a.

³ La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsóan va itén ch'án. Ntá t'iyexín ch'án jnkojnko ihnié jnkojnko tí kolélo kuènte ch'án ntá ts'axrjexín va ntóe va.

⁴ Ntá t'ikon ch'án kixin k'uaxrje kaín va ntá kuítonhen ch'án va ntia ntá tinkáchréhe va kixin tjatsóan va itén ch'án.

⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsóanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús ínaá ntáchro ch'án kixin:

—Ijnko nkehe tjetóan tsotjonkará kixin janhan la éxí tí puerta t'ixenxín tí kolélo tí t'inkachjina va.

⁸ Kaín tí sín kuitónxin ntja kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín.

⁹ Janhan mé tí puerta a mé t'ixenxínrá tí janhan mé tsaará la mé tsyóhará tí kolélo síin kjuachaxin ts'axrjexín va tí kòrré va sátsjikjine va la ko síin kjuachaxin ts'ixenhen va tí ts'inkachjina va ínaá.

¹⁰ 'A ntá xíchee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochríxín.

¹¹ Janhan mé ijnko pastor jína a ntá tí pastor jína mé ts'enyákonhen tí kolélo a.

¹² A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsínká va la sátsjichroe va.

¹³ Mé xíkaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuenté tí jehe va.

¹⁴⁻¹⁵ 'A ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxin janhan choxian tí jehe ch'án mé xíkaha choxian janhan tí sín éxí kolélo kuèntana la ko jehe sín mé chóxin sín tí janhan. Ntá ts'ényákonhan tí sín éxí kolélo kuèntana.

¹⁶ Kjaxin chonta kolélo naxa jehya kòrré va ntihi mé kjaxin t'ichjánxin sátsjícakjián va. A ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna ínaá.

¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankíxin jnkokoáhya kjuenkayáxin sín.

²⁰ Nchónhya tí jehe sín ntáchro sín kixin:

—¿Nkekuénté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kixin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinchek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'ín Jesús

²² A ntá tí nchakuen kin tí chjasin Jerusalén k'uíxin kia xraxinkakonxín sín tí yaon tsíkjixin tsík'óna nínko.

²³ Ntá ch'ín Jesús itjen ch'án tí nínko tí ntasin kuènte Salomón.

²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chronka ntoá kixin á chaxín jaha tí Cristo —ichro sín.

25 Ntá kjuátehe ch'ín Jesús kixin:

—Ó tjonkará ntá naxa titekákonhyará. Kaín tí xra tjét'a janhan tí kjuachaxin kuente T'aná mé tjakoxin nkexro tí janhan.

26 Kjánchó jahará titekákonhyará kixin jahará la jehya kolélo kuëntana éxí tjonkará senó.

27 Tí kolélo kuëntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan.

28 Janhan mé tjaha va tí kjuachón jnkochrixin la í ts'itjáyanhya va la ko ninkexró tsjachahya tsakit-sjexín va tjaná.

29 Ó kjuanjon T'aná, mé tí nkexro tjetóxin t'etōan, na ninkexró tsjacha tsakitsjexín va tí tja ch'án.

30 Janhan la ko T'aná na mé jnkokoá nkexro tíha —ichro ch'án.

31 Ntá tí sín judío kuákja sín xro chróchjéhe sín ch'án inaá.

32 Ntá kjuátehe ch'ín Jesús ntáchro ch'án kixin:

—Nchónhya nkehe jína k'uikonrá kjuákoxian kjuachaxin kuente T'aná. ¿Ntá nkekuèté chróchjinará xro? —mé chro ch'án.

33 Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuinchejóhé asán Dios na mé tsotjiáxiánni xro —ichro sín.

34 Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxí Dios tí jahará.”*

35 Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé

* 10:34 Salmo 82.6

xíkaha ntáchro Dios kixin éxí Dios jnkojnko nkexro k'uáyéhe itén ch'án.

³⁶ A ntá kjueyána Dios ichr'ánna ch'án chjasintajni, ¿ntá nkekuèté ntáchrora kixin k'uántaxínhan Dios kixin janhan ntáxrjan kixin Xjeen Dios tí janhan?

³⁷ Kja tí chrókjuít'ahya tí xra ich'e T'aná la chrókuítekákonhyará.

³⁸ A ntá kjónté tjét'a tí xra a kjónté títekákonhyará tí janhan na mé chrókuítekáonrá tí xra tjét'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xíkaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntarío Jordán inaá tí k'uékjak'e ch'ín Juan k'uékikítexín ch'án chojni senó.

⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jíe la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta.

² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín

aceite xraxé toté Ìnchéni la ko kjuínchexámáxin tjan kaxihi tjan toté ch'án.*

³ A ntá yóí tí kichó ch'án chjin ichr'án sín ijnko nkexro tsochénka tí ch'ín Jesús kixin:

—Ìnchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhi. Tíha mé tsjakoxin tí kjuachaxin jié kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro.

⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon ínaá tí nó kjuák'e ch'án.

⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea ínaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha ínaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a.

¹⁰ Tí sín ixri tie mé tsóténkixin sín nkehe kixin chóntahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

* 11:2 Juan 12.3

—Ó k'uájua tí nkexro chóxinni mé ch'ín Lázaro. Ntá sátsjia s̄intakjayaḥa ch'án —ichro ch'án.

¹² Ntá ntáchro tí sín k'uájiko ch'án ḱixin:

—Ìnchéni, tí k'uájua ch'án la mé chrókuitoḥe ch'án jína —ichro sín.

¹³ Kjánchó tí nkehe ntáchro ch'ín Jesús mé t'axrjexín ḱixin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín ḱixin ó jehí tjejua ch'ín Lázaro.

¹⁴ Ntá ntoá chrónka ch'ín Jesús ḱixin:

—Ó tsík'en ch'ín Lázaro.

¹⁵ Ntá chàna ḱixin kohyana ntiha ḱixin mé xikaha tsítekákonxínrá. A ntá jie ìntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin t̄ik̄itexín sín ch'án ch'ín Nóhé, mé ntáche ch'án tí í so sín ḱixin:

—Sátsjini koíni kaín ni ts'enkaoni Ìnchéni —ichro ch'án.

Ch'ín Jesús ntáchro ch'án ḱixin sinchexechón ch'án chojni ínaá

¹⁷ Ntá kjuíji ch'ín Jesús kuínhin ch'án ḱixin ch'ín Lázaro la ó chóna noó yaon tsík̄jixravá ch'án.

¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò ḱinxin.

¹⁹ A ntá itsjé tí sín judío sátsík̄jitsjehe sín tí tjan Marta la ko tí tjan María tjejónixjehe sín ḱixin kánhyó ts'ává sín ḱixin tsík'én tí kichó sín a.

²⁰ Ntá kuínhin tjan Marta ḱixin ó kui ch'ín Jesús ntá k'uaxrjexín tjan nchia tsj́ixinhin nt̄ia. A ntá tí tjan María kuítóḥe tjan nchia.

²¹ Ntá tí tjan Marta ntáche tí ch'ín Jesús ḱixin:

— Ìnchéni jaha. Chrókjuak'e ntihi ntá chrók'uenhya kíchó ni.

²² Kjánchó ó nòna kixin Dios tsotjáha kaín nkehe tsjanchehé ch'án — ichro tjan.

²³ Ntá ntáchro ch'ín Jesús kixin:

— Tsoxechón kíchuá ínaá — ichro ch'án.

²⁴ Ntá ntáchro tjan Marta kixin:

— Ó nòna kixin tsoxechón ch'án tíó tsoxechón kaín tí sín tsík'en, tí yaon tsjixixin — ichro tjan.

²⁵ Ntá ntáchro ch'ín Jesús kixin:

— Janhan mé ntaxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín ínaá.

²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á títekavan xikaha ní? — ichro ch'án.

²⁷ Ntá ntáchro tjan kixin:

— Chaxín Ìnchéni títekavan kixin jaha mé Cristo, mé Xjeen Dios, mé tí nkexro kui chjasintajni — ichro tjan.

Tsjánka ch'ín Jesús tí tsíkjixravá nkexro Lázaro

²⁸ Ó kjuixin ntáchro tjan Marta xikaha ntá sákjuík'íyehē tjan kíchó tjan María ntá imó chénka tjan kixin:

— Ntiha tjen Maestro t'iyahá ch'án — ichro tjan.

²⁹ Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús.

³⁰ Naxa tsík'ixenhya ch'án chjasin naxa tjen ch'án tí xéta ch'án tjan Marta.

³¹ Ntá tí sín judío tjejónixjehe tjan María kixin kánhyó ts'ává tjan, mé k'uíkon sín kixin tjoka k'uaxrxéxín tjan nchia, ntá kjuíchréhe sín tjan

kjuenkayáxin sín kixin sátsji tjan tí tsíkji_xravá kichó tjan, ntaha tsjitsjánkàma tjan ch'án, ichro sín.

³² Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntáchro tjan kixin:

— Ìnchéni jaha, chrókjuak'e jaha ntihi ntá chrók'uenhya kichiná — ichro tjan.

³³ Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án.

³⁴ Ntá kjuanchankí ch'án kixin:

— ¿Nketí kjuavará ch'án? — ichro ch'án.

Ntá ntáchro sín kixin:

— Ìnchéni, ¿á sátsjitsjehé? — ichro sín.

³⁵ Ntá tsjánka ch'ín Jesús.

³⁶ Ntá ntáchro tí sín judío kixin:

— Tsjehérá kixin imá tjuèhe ch'án tí ch'ín tsík'en — ichro sín.

³⁷ Kjánchó í so sín ntáchro sín kixin:

— Jehé ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? — ichro sín.

Ó xechón ch'ín Lázaro

³⁸ Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'íkjàxin ijnko xro.

³⁹ Ntá k'uetōan ch'ín Jesús kixin:

— Tjakjíyan tí xro a — ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

— Ìnchéni, kjá noha kixin kjá imá xra kixin ó chóna noó yaon tsík'en ch'án — ichro tjan.

40 Ntá kjuátēhe ch'ín Jesús ntáchro ch'án kixin:

—Ó tjonka kixin tsítekávan ntá ts'ikuan tí kjuachaxin jié kuènte Dios —ichro ch'án.

41 Ntá kjuakjìn sín tí xr̄o a. Ntá ch'ín Jesús konta ch'án nkajní ntáchro ch'án kixin:

—It'éni, tjáncháha kjuasáya kixin ó kuínhín tí nkehe ntáxrjan.

42 Janhan na ó nòna kixin xráxín tjetinhín tí nkehe ntáxrjan ntá xikaha ntáxrjan jie kixin tsinhin tí sín tjejóntaxín ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

43 Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

44 Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án nax̄a tjejóchróntetoxín ka la ko tí nkayakon ch'án tjejkjèxin ijnko ka. Ntá k'uetōan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyán sín tí ch'ín Jesús

(Mt. 26.1-5; Mr. 14.1-2; Lc. 22.1-2)

45 Ntá itsjé tí sín judío sákjuíkotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án.

46 Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsíkjasin ch'ín Jesús.

47 Ntá tí sín fariseo la ko tí sín nch̄at'á t'etōan jnkokoá kójnkotséko sín tí sín antsí t'etōan, la ntáchro sín kixin:

—¿Xá nkexrí chrókjuich'eheni tí ch'ín a kixin jehe ch'án mé tjasin ch'án kjuaxroan jíé?

48 A ntá tí chrókuítóheni ch'án xikahó ntá kaín xín chojni chrókuitekaon sín tí jehe ch'án, ntá tsi tí sín romano t'etōan sinchek'itjáyan sín tí ninkoéni la ko tí xra chóntani la ko tí nación kuènténi —ichro sín.

49 Ntá ch'ín Caifás mé tí nkexro t'etuenhen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó tíha

50 la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjáyanhya kuenté tí nación kuènténi —ichro ch'án.

51 Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetuenhen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía.

52 A ntá jehya tí nación kuènte sín ó chrók'uenyákonhen ch'án. Náhí. Kjaxin kixin sinchekaá ch'án kaín tí sín ts'óna xjeen Dios tjejó sín kuenté chjasintajni.

53 A ntá tí yaon a tí sín t'etuenhen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

54 A ntá ch'ín Jesús la í noxínhya k'uáji tí k'uéjó tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítóeko ch'án tí sín k'uájiko ch'án.

55 Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexín

sín chjasén sín sákjui sín chjasin Jerusalén kixin ntaha tsoyaxínhin sín kixin tsotjóá sín kjónté naxa xrankíxinhya ts'ixin tí kia pascua.

⁵⁶ Ntaha k'uájikjeyá sín tí ch'ín Jesús k'uéjoxenhen sín tí n̄nko jié ntá kjuanchankíhi sín kíchó sín kixin:

—¿Jahará nkechorá? ¿Á chrókjui ch'án tí kia ní o náhí? —ichro sín.

⁵⁷ A ntá tí sín fariseo la ko tí sín t'etuenhen tí sín ncha'tá na ó k'uetōan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuisé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrjón toté tí ch'ín Jesús

(Mt. 26.6-13; Mr. 14.3-9)

¹ Naxa t'itjayan injon yaon ntá ts'ixin tí kia pascua. A ntá ch'ín Jesús sákjui ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án.

² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjó sín kjóneko sín tí ch'ín Jesús.

³ Ntá tjan María kuikao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan.

⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín

Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuènté kóxihya tí xroan xraxé, chrókóxixin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókujikonóehé ch'án tí sín nòà. Náhí. Ntáchro ch'án tíhi kixin xráxín chee ch'án kixin jehe ch'án t'ayakonhen ch'án tí nkehe tjinká chichaon ntá xráxín teé ch'án tí chichaon tsíxrenájín ntiha.

⁷ Ntá ntáchro ch'ín Jesús kixin:

—Nté tìtòhéra tjan. Tsíkjak'echjina tjan tí xroan a kixin tí yaon tsoxrávána.

⁸ Tí sín nòà jnkochrín ts'ejokoará sín. A ntá janhan jnkochrínhya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús.

¹⁰ Ntá tí sín nchát'á t'etòan mé kójnkotsé sín kjuenkayáxin sín chrók'óyán sín tí ch'ín Lázaro kjaxin

¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín nchát'á.

*K'uixenhen ch'ín Jesús chjasin Jerusalén
(Mt. 21.1-11; Mr. 11.1-11; Lc. 19.28-40)*

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin

k'uixikónohe sín kixin tsjiji ch'ín Jesús tí chjasin ntiha.

¹³ Ntá kóchrínjin sín chaan ntakajni kjuíxinhin sín ntia itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxién It'éni tjen nkaya nkajni. Imá jína tí ch'ín Rey ts'etuēnhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kixin:

¹⁵ Chrakonhyará jahará tjejorá chjasin Jerusalén, tsjehérá ó tjekui tí ch'ín Rey kuèntará, tjekjen ch'án ijnko kolócho.*

¹⁶ A ntá tió kónhen tíha kíenxínhya tí sín k'uájiko ch'ín Jesús kixin nkekuènté xikaha kónhen. A ntá chr'éxin tió kjuixin sákjujia ch'án nkaya nkajni ntá xraxinkaon sín kixin xikaha tsíkin tí sín k'uéchrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

¹⁷ Mé xikaha kaín tí sín tsíkójnkotsé tí kjuák'e ch'ín Jesús tió k'uíyehē ch'án tí ch'ín Lázaro kixin ts'axrjexín ch'án tí tòyē tsíkji_xravá ch'án ntá xechón ch'án mé tí sín a mé chrónka sín tí nkehe k'uikon sín.

¹⁸ Mé xikaha sákjuíxinhin sín tí ntia tsjixin ch'ín Jesús, k'uixikónohe sín kixin xikaha tsíkjasin ch'ín Jesús tí kjuaxroan jíé.

¹⁹ Mé xikaha ntáchro tí sín fariseo itjo sín kichó sín kixin:

* **12:15** Zacarías 9.9

—Tsjeherá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjeýá sín tí ch'ín Jesús

²⁰ Iso sín nixja griego k'uejójákjan tí sín sákjuí sín tí kia chjasin Jerusalén tsoxraxinkakonxín sín Dios.

²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kixin:

—Tjinkaonni chrók'uikonni tí ch'ín Jesús —ichro sín.

²² Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús.

²³ Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é.

²⁴ A ntá tsotjonkará ijnko nkehe chaxín kixin tí chrókjuítsínkahya ijnko noatrigo tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín.

²⁵ A ntá tí nkexro imá tjuèhe asén kixin koha nkehe chrók'uatsínka na mé tsochóntahya ch'án kjuachón jnkochrín. A ntá tí nkexro tjekuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín.

²⁶ A ntá tí jnkojín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín

xra. A ntá jnkojín sín sich'ena sín xra xikaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

27 'Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhí? Kjánchó xra ó k'uinka xikaha tsona.

28 Jaha It'éni, tjákoxian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuákoxian tí kjuachaxin la ko xikaha xikjákoxian inaá.

29 A ntá tí sín tjejóntaxín tsíkinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

30 Kjánchó ntáchro ch'ín Jesús kixin:

—Náhí. Jehya kixin janhan tí jie chrókuinhan tí nixja ch'án. Náhí. Nixja ch'án kixin tsinhínrá jahará.

31 Ntá jie tsitoexín tí ijjé chojni chjasintajni na mé tí nkexro t'etōan chjasintajni mé ts'axrjehe ch'án tí xra t'etōan ch'án.

32 A ntá tió tsjak'énkānia ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

33 Mé xikaha chrónkaxín ch'án kixin nkexrí ts'enxín ch'án.

34 A ntá kjuátehe tí sín ntiha ntáchro sín kixin:

—Kuínhinni nchekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuèté ntáchrúa kixin tí Xjeen Dios

K'óna Chojni t'ichjánxìn tsjak'enkání ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxín ntia. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín.

³⁶ Títekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uikónxín kon sín ntá kjónté kuítekakuenhya sín ch'án

³⁸ kixin mé xikaha tsoxiteyá tí nkehe tsíntáchro ch'ín Isaías tsíkjin ch'án ósé kixin:

Ìnchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

³⁹ Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókienxínhya sín,

kixin ntá chrókóchjinehya sín tí janhan kixin chrókjuíntakitoha sín jína.‡

† 12:38 Isaías 53.1 ‡ 12:40 Isaías 6.10

41 Xikaha k'uechrónka ch'ín Isaías imá ósé kixin k'uek'ikon ch'án tí kjuachaxin jié kuènte Jesús ntá k'uechrónka ch'án nkexrí tsjak'e tí ch'ín Jesús.

42 Kjánchó itsjé tí sín judío t'etoan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonha sín kjuachaxin chrók'uixenhen sín tí ninkoe sín judío.

43 Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexín ijié chojni

44 Ntá itsen nixja ch'ín Jesús ntáchro ch'án kixin:

—Tí títekáonrá tí janhan na mé jehya janhván títekáonrá na mé kjaxin títekáonrá T'aná, mé tí nkexro k'uetuanna k'uinka.

45 Éxí tí t'ikonrá tí janhan mé xikaha t'ikonrá tí nkexro k'uetuanna k'uinka.

46 A ntá janhan mé xrohi k'uinka chjasintajni kixin tí sín títekaon sín tí janhan ts'ejóhya sín tí sítié a.

47 A ntá tí jnkójinrá tinhínrá tí nkehe xrjanka ntá títekáonnahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni.

48 A ntá tí títekákonhyará tí janhan la ko títekákonhyará tí tan kuèntana la ó siín nkexrí tsitoexín ijiará, na mé éxí tí tan xrjanka mé Dios sinchekitoexín ijiará tí yaon tsjixixín chjasintajni.

49 Jehya tí nkehe kuèntana tjéxrjanka. Náhí. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjàkua.

⁵⁰ **A** ntá nòna kíxin tí nkehe k'ueṭoan T'aná mé xranjonxín tí kjuachón jnkochrín. Mé xikaha tí nkehe ntáxrjan mé tjéxrjanka kíxin T'aná mé k'ueṭuanna.

13

Ch'ín Jesús kjuínchek'ònti ch'án toté tí sín k'uájiko ch'án

¹ **A** ntá tí yaon xika tí ntóye tsjasin sín tí kia pascua. **A** ntá ch'ín Jesús ó nohe ch'án kíxin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xráxín tjuèhé ch'án tí sín kuènte ch'án chjasintajni, **a** ntá jie tsjakoxin ch'án kíxin imá tjuèhe ch'án tí jehe sín.

² **A** ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kíxin sinchekji ch'án tí ch'ín Jesús.

³ Ntá ch'ín Jesús la ó nohe ch'án kíxin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kíxin It'é ch'án tsíkjanjon kjuachaxin ts'etuenhen ch'án kain xín nkehe.

⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ònti k'uínkat'óxin ch'án.

⁵ Ntá kuikja ch'án ijnko nkehe nta, ntá kjuankíxin ch'án kjuínchek'ònti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, **a** ntá ntáchro ch'ín Pedro kíxin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

7 Ntá kjuátehe ch'ín Jesús ntáchro ch'án kixin:
 —Jaha la naxa tiénxinha tí nkehe tjet'a janhan.
 Chr'exin ntá tsiénxian nkekuénté tjet'a tíha —ichro ch'án.

8 Ntá ntáchro ch'ín Pedro kixin:
 —Jaha la sinchek'óntihya toténi —ichro ch'án.
 Ntá ntáchro ch'ín Jesús kixin:
 —Tí sintak'óntihya tí jaha la kjá ninkehó tsochontahya tí janhan —ichro ch'án.

9 Ntá kjuátehe ch'ín Simón Pedro ntáchro ch'án kixin:
 —Náhi, Ìnchéni. Jehya tí toténi ó chrókjuinçek'óntia. Kjaxin itjani la ko ikjani chrókjuinçek'óntia —ichro ch'án.

10 Ntá ntáchro ch'ín Jesús ínaá kixin:
 —Tí sín tsíkjixin tsík'ónti la t'ichjánxinha kuenté sín ts'ónti sín ínaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

11 Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

12 Ntá tió kjuixin kjuinçek'ónti ch'án toté sín kaín sín ntá xík'inkáya ch'án ínaá tí ka kuítsáte ch'án ntá kjuák'etjaxin ch'án tí k'uínkatjénxin ch'án. Ntá ntáchro ch'án kixin:

—¿Á kiénxinrá tí nkehe kjuít'a?

13 Jahará la ntáchrórá kixin janhan Maestro kuéntará la ko Ìnchárá. Chaxín ntoá ntáchrórá kixin janhan tíha.

14 Janhan tí Maestro kuéntará la ko ìnchárá kjuintak'óntia totará. A ntá jahará kjaxin xikaha chrókjuinçek'óntirá toté kichuárá.

15 Janhan mé kjuáko_xia_n kíxin xikaha chrókjuich'era_n éxí kjuít'a janhan.

16 Ijnko nkehe chaxín tsotjonkará kíxin tí sín ch'exón xra_n mé t'etoanhya sín éxí t'etoan tí lámoe sín, la ko tí sín k'uáyéhe sín ijnko xra_n t'etoanhya sín éxí t'etoan tí sín kjuanjon tí xra_n a.

17 Tí chrókiénxinrá nkehe tíha la ko chrókjuinchexiteyará la chrókócháhará má.

18 'Jehya kaín rá xikaha ntáxrjan. Ó nòna kíxin nkexro kjuéyá janhan. Kjánchó t'ichjánxin tsoxiteyá tí nkehe tsíkjín sín ósé ntáchro kíxin: “Ijnko nkexro tjéne_kian mé tsjanjonkian.”*

19 Mé xikaha tjétjonkará senó kíxin tió ts'atsínka tíha ntá tsítekáonrá kíxin janhan mé tí nkexro xráxín tjen.

20 Ijnko nkehe tjetoan tjétjonkará kíxin tí tsjánjonrá kjuachaxin tsit_ohe tí chojni ichr'an janhan, mé éxí yóhe chrókjuánjonrá kjuachaxin chrókuit_ohe tí janhan, a ntá tí tsjánjonrá kjuachaxin tsit_ona janhan mé éxí yóhe chrókjuánjonrá kjuachaxin chrókuit_ohe tí nkexro k'u_etu_ana k'uinka —ichro ch'ín Jesús.

Ch'ín Jesús chrónka kíxin ch'ín Judas sinchekji ch'án

(Mt. 26.20-25; Mr. 14.17-21; Lc. 22.21-23)

21 Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kíxin:

—Ijnko nkehe tjetoan tsotjonkará kíxin jnkojínrá tjejorá ntihi mé sinchekjiráni —ichro ch'án.

* 13:18 Salmo 41.9

22 Ntá tí sín k'uájiko ch'án kjuanjíxin komáxin la ko í komáxin kíchó sín kíxin noehya sín nkexro tí ntáchro ch'án.

23 A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín.

24 Ntá ch'ín Simón Pedro kjuakœxín seña k'uetuēhen ch'án tí í jnko ch'ín a kíxin:

—Tjanchankíhí ch'án nkexro tíha —ichro ch'án.

25 A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kíxin:

—Ìnchéni, ¿nkexro tíha? —ichro ch'án.

26 A ntá kjuátehe ch'ín Jesús ntáche ch'án tí ch'ín a kíxin:

—Sintakjata it'ò nioṭja, a ntá tí nkexro tsotjaha tí t'ò nioṭja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'ò nioṭja ntá chjéhe ch'án tí ch'ín Judas Iscariote, it'é ch'án mé it'in Simón.

27 Ntá k'uáyéhe ch'án tí nioṭja ntá tuénxín k'uíxēhen asén ch'án tí ch'ín Tsochren. Ntá ntáche ch'ín Jesús tí jehe ch'án kíxin:

—Tí xrā tjinkávan sīch'e la jaí tóxakonhan —ichro ch'án.

28 Kjánchó nijnko tí sín tjejóne ntiha kienxínhya sín nkekuènté xikaha ntáchro ch'án.

29 Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kíxin ách'e ch'ín Jesús mé k'uetuēhen ch'án tí ch'ín Judas kíxin ichrén nkehe sátsjik'ena ch'án kuènte tí kia a, o ách'e ichrén nkehe sinchekitonhen ch'án tí sín nò a.

³⁰ Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uíxin tie.

Ijnko nkehe nixin k'uetōan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxin jié kuènte tí Xjeen Dios K'óna Chojni la ko tsjakoxin ch'án tí kjuachaxin jié kuènte Dios.

³² Na mé xikaha tí Xjeen Dios K'óna Chojni mé tsjakoxin tí kjuachaxin jié kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá.

³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'uétjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.†

³⁴ Ijnko nkehe nixin tétuanhanrá ijie kixin chrótjuèhérá kichuára éxí yóhe tjuahará mé xikaha chrótjuèhérá kichuára.

³⁵ Tí tsotjuèhérá kichuára ntá tsonoexín kaín xín chojni siín chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Ìnchéni, ¿nketí sátsjia? —ichro ch'án.

Ntá kjuátēhe ch'ín Jesús ntáchro ch'án kixin:

† 13:33 Juan 7.33

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuènté xitjahya tsochráha tí jaha jaí? Kjónté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochíntoa la ó tsjixin sìnchemána níya kixin chonhyana, tsixrua.

14

Jesús mé ntia sátsjixinni tí tjen It'eni tjen nkaya nkajní

¹ 'Tóxakuanhyará jahará. Títekáonrá Dios la ko kjaxin títekáonrá tí janhan.

² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintayóxian tí chrók'uejóni.

³ A ntá tí sátsjiyá sintayóxian, ntá tió tsjixin ntá ts'inka ínaá, ntá sátsjini kixin jahará kjaxin chrók'uejorá ntiha tí tsjak'é janhan.

⁴ Jahará la ó nohará nketí sátsjiyá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jína tsjiji tí tjen T'aná.

⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

— Ìnchéni, tìtohéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

— Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchàna kixin chrókuítóhà chrók'uikonrá tí T'aná?

¹⁰ ¿Á títékákonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níjja janhan la jehya kuèntana. Náhí. T'aná tjékian janhan mé tjech'e ch'án tí xra kuènte ch'án.

¹¹ Títékáonrá kixin jnkokoá tjékian T'aná, a ntá T'aná itjen tí tjén janhan. Kjonté kuítékákonhyará xikaha la chrókuítékáonrá kixin tí kjuaxroan jie kjuákoxian k'uikonrá.

¹² Ijnko nkehe chaxín tjonkará kixin tí chaxín tsítékáonrá tí janhan ntá kjaxinrá tsjachará sich'erá xra yóhe tjet'a la ko kjaxin ixra antsí jie tsjachará sich'erá kixin janhan la ó sátsjiyá tí tjen T'aná.

¹³ Kaín nkehe tsjanchatóxixínrá tí njina na mé tsjánjuan kixin xikaha tsjákoxian tí kjuachaxin kuènte T'aná.

¹⁴ Tí chrén nkehe tsjanchatóxixínrá njina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

15 'Tí chaxín tjuèhérá tí janhan ntá chrókjuinchexiteyéhérá tí nkehe kuétuanhanrá.

16 Ntá tsoxrjannóahā T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochrín.

17 Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochrín.

18 Janhan na tsitoáhyará nòerá jahórá, na mé tsokjan ínaá kixin ts'ejóni.

19 A ntá séhya ntá tí sín chjasintajni ts'ikonhya sin tí janhan ínaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuān.

20 A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni.

21 Tí nkexro nohe tí nkehe tétōan la ko sinchexiteyéhe sín mé xikaha tsjakoxin sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuahā sín la ko tsjakoxian nkexrí tjén janhan —ichro ch'ín Jesús.

22 A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ìnchéni, ¿nkekuènté jehóni tjákoxian, a ntá tjákoéxinhya tí chojni chjasintajni? —ichro ch'án.

23 Ntá kjuátēhe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétōan. La ko T'aná mé tsotjuèhe tí jehe

sín la ntá T'aná la ko janhan ts'ejókoni sín.

²⁴ A ntá tí sín tjuèhya tí janhan la mé nchexiteyèhya sín tí nkehe tjàkua. A ntá tí nkehe tjàkua tjejotinhínrá la jehya kuéntana. Náhi. Kuènte T'aná tí nkexro k'uetuanna k'uinka.

²⁵ Naxa tjejóni la tjétjonkará kaín tíhi.

²⁶ A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánrá la ko tsjakohará kaín nkehe la ko sinchexraxinkaonrá kaín nkehe xrjanka.

²⁷ Kjuaxróxin tsitoha la ko kjuaxróxin kuéntana tsotjahará. Jehya éxí tí kjuaxróxin chrókjuanjon tí sín chjasintajni. Náhi. Chrókóxakuenhya asánrá la ko chróchrakonhyará.

²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni inaá. Tí chaxín tjuéhérá tí janhan ntá chrókócháhará tí kuínhínrá kixin sátsjiyá tí tjen T'aná kixin antsí t'etoan ch'án la kánhyó tétōan janhan.

²⁹ Senó tjétjonkará tíhi kixin tió tsonhen tíha la ts'ikonrá ntá tsitékáonrá jahará.

³⁰ Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuēhen tí sín chjasintajni. A ntá jehe ch'án la ninkehó t'etuannahya tí janhan.

³¹ Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuaha T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ Janhan mé éxí yóhē ijnko ntanòa tjechón itsa to uva la ko T'aná mé éxí yóhē tí nkexro t'ayakonhen tí nta a.

² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to.

³ A ntá jahará la kótjuáxinrá tí tanná k'uétjonkará senó.

⁴ Tí tsítóéhyará tí janhan ntá kjáxin janhan tsítóahya tí jahará. Mé xíkaha ijnko chaan nta ts'axrjentehe tsjachahya jehó ts'óna to, la ko xíkaha jahórá tsjachahyará sich'erá tí xra kuèntana tí tsítóhérá tí janhan.

⁵ Janhan na mé yóhē tí ntanòa, a ntá jahará la tí chaan tí ntanòa tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín.

⁶ A ntá tí nkexro jnkokoáhya tjenkayáxinkian na mé éxí yóhē tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ Ntá tí chaxín tsítóéhyará tsinkachónkirá tí janhan la ko ts'itjáyanhyará tí nkehe kjuákohará ntá tsjanchará ichrén nkehe tjinkáonrá la ts'ayéhérá.

⁸ A ntá T'aná la tsóchéhē ch'án tí ts'ónará itsjé to. Mé xíkaha tsjácoxinrá kixin tinkachónkirá tí janhan.

⁹ Janhan tjuahará tí jahará éxí tjuana T'aná. Chrókónohará kixin tjuahará.

¹⁰ Tí tsítekáonrá tí nkehe kuétuanhanrá ntá tsonohará kixin tjuahará éxí yóhē kjáxin janhan

ntaxiteyá tí nkehe k'uetuanna T'aná ntá kónòna janhan kíxin tjuana ch'án.

11 'Mé xikaha tjonkará kaín tíha kíxin ntá éxí chàna mé xikaha tsjintaxín tsochéhe asánrá.

12 Tí nkehe kuétuanhanrá la mé tíhi kíxin chrótjuèhérá kíchuárá éxí tjuahará xikaha.

13 Ninkexró chrókóyóhé éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín.

14 Jahará la chojni choxian tí tsítekáonrá tí nkehe tétuanhanrá.

15 Ntáxrjanhya janhan kíxin jahará chojni ch'exón xra kíxin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kíxin kaín xín nkehe kjuakona T'aná mé kjuákohárá.

16 Jehya kíxin jahará kjuéyárá tí janhan. Náhí. Janhan mé kjuéyá tí jahará kíxin tsotjahará xra, a ntá éxí yóhé to xé mé chrók'uaxrje jína tí xra sich'enará kíxin chrók'uitjáyanhya. A ntá T'aná mé tsotjahará ch'án kaín xín nkehe tsjanchéxínrá nina.

17 Mé xikaha tétuanhanrá kíxin tsotjuèhérá kíchuárá.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

18 'Tí tsonínkakonhanrá tí chojni chjasintajni ntá chrókónohará kíxin senó janhan nínkakonna sín.

19 Tí chrókókuèntárá chjasintajni ntá tí sín chjasintajni chrótjuahará sín kíxin naxa kjéhyará sín. Kjánchó janhan kjuéyá tí jahará kíxin chrók'uaxrjékjanxínrá tí sín siín chjasintajni. A ntá tí sín chjasintajni nínkakonhanrá sín kíxin jahará jahyará kuèntárá chjasintajni.

20 Xŕaxinkáonrá tí nkehe tsítjonkará ḱixin tí sín ch'ehe lámøe sín xra tjetóxinhya ts'etøan sín.* Éxí yóhø chónkìna sín mé xíkaha tsochónkíhi sín tí jahará. A ntá tí kuítekaon sín tí nkehe kjuákoḥa sín ntá kjaxin tsitekaon sín tí nkehe naḡa tsjákohérá sín.

21 Mé xíkaha sit'ahará sín ḱixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

22 Tí chrók'uinkahya janhan ntihi chrónixjahya sín ntá chrókuamáhya sín jìe. Ntá jíe kohya nkerí tsaáxin sín ḱixin tí jìe tinkákjasin sín.

23 Tí sín nínkakonna mé xíkaha nínkakonhen sín T'aná.

24 Chróchóntahya sín jìe tí chrók'uejókianhya sín ntihi chrókjuásinhya janhan kjuaxroan jíe éxí tsíkjasinhya ninkexró senó. Ntá jie ó k'uíkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin.

25 Mé xíkaha tsonhen kaín tíha ḱixin ntá tsoxiteyá tí nkehe ntáchro tí ley kuènte sín ḱixin: “Kohya jìe kjuásian janhan ntá kjónté kónínkakonna sín.”†

26 A ntá tsi tí nkexro tsjinkìtsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án ḱixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan

27 la ko jahará kjaxinrá tsochronkará nkexrí tjén janhan ḱixin tí xrankíxixín la k'uejóni jnkokoá.

16

1 'Kaín tíhi tjétjonkará ḱixin chrókuítóéhyará tí

* 15:20 Juan 13.16 † 15:25 Salmo 35.19; 69.4

nkehe kjuákohará.

² Tí sín judío tsjanjonhya sín kjuachaxin ts'ixenhenrá n̄inkoé sín la ko tsjixraká tí yaon ḱixin tí sín ts'óyán sín tí jahará tsontáchro sín ḱixin x̄ikaha mé tjejóch'e sín xr̄a kuènte Dios, tsixro sín.

³ Mé x̄ikaha sich'e sín ḱixin chónhya sín T'aná la ko chónhyana sín.

⁴ A ntá tjonkará kaín tíhi ḱixin tió tsjixraká tí yaon x̄ikaha tsonhen ntá tsoxráxinkáonrá ḱixin ó k'uétjonkará senó a.

Tí xr̄a ch'e Nchakuen Dios

'Tí xrankíxixín k'uétjonkahyará tíhi ḱixin jnkokoá k'uék'ejóni.

⁵ Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá.

⁶ Ntá kjuixin tjonkará tíha ntá imá t'avará ḱixin kuínhínrá x̄ikaha xr̄janka.

⁷ A ntá chaxín tí nkehe tjétjonkará ḱixin íchá jína sátsjiyá ḱixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkitsará. A ntá tí sátsjiyá janhan ntá tsétoan ḱixin itsi ch'án ntihi.

⁸ A ntá tió tsi ch'án mé sinchexraxinkaon ch'án tí chojni chjasintajni ḱixin jehe sín mé tjasin sín jie, la ko itjen ijnko nt̄ia ntoá chrókuakja sín la ko Dios mé sinchekitoexín tí jie kjuasin sín.

⁹ X̄ikaha chóna sín jie ḱixin tinkáchónkihya sín tí janhan.

¹⁰ A ntá tsonohe sín ḱixin itjen tí nt̄ia ntoá ḱixin sátsjiyá tí tjen T'aná ntá ts'ikonhyará tí janhan ínaá,

11 la ko tsonohe sín kixin Dios sinchekitoexín ijie kixin ó kjuixin kuítóexín ijie tí nkexro t'etoan chjasintajni kixin tsjasóte.

12 'Naxa chonta janhan itsjé nkehe chrótjonkará, kjánchó chrókjuachahyará chrókiénxinrá jie.

13 A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuente ch'án tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin.

14 Jehe ch'án mé tsjikosàyana ch'án kixin ts'áyéhe ch'án tí nkehe kuéntana ntá tsjakohará ch'án nkehe tíha.

15 Kaínxín nkehe chóna T'aná na mé kuéntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjakohará ch'án nkehe tíha.

Senó ts'áva sín ntá chr'éxin tsochéhe sín

16 'Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

17 Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án?

18 ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

19 Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjetjanchankíhírá kíchuará ní?

20 Tjetjjonkará ijnko nkehe chaxín kixin imá tsotsjan kará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sintanihará kjónté chr'éxin tsocháhará má.

21 Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni.

22 Mé xikaha jahará ijie t'avará. Ntá xik'íkuən tí jahará inaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

23 'Tió tsi tí yaon a ntá tsjanchankínahyará ninkehó. Chaxín tí nkehe tjetjjonkará kixin T'aná tsotjáhará ch'án kaín nkehe tsjanchatóxixínrá nina.

24 Naxa kjuánchatóxixínhyará ninkehó tí nina. Ntá jie tjanchiará la ts'ayéhérá, a ntá tsjintaxín tsocháhará.

Inchéni Jesucristo mé kjuacha ch'án k'ueṭoan ch'án, ntá chjasintajni la náhi

25 'Tí nkehe tjetjjonkará mé kjuıntayóaxián ó. Ntá tsjixraká tí yaon la í ninkehó sintayóaxián na mé ntoá tsotjjonkará nkexrí tjen T'aná.

26 A ntá tí yaon a mé tsjanchaxínrá nkehe nina. Ntá ntáxrjanhya tíhi kixin tsonixjayákonhanrá tí tjen T'aná

²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios.

²⁸ K'uaxrjéxian tí tjen T'aná k'uinka chjasintajni. Ntá jie la ó tsitohá chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya.

³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkójín nkexro chrókjuanchankíha sín ichrén nkehe. Méxra xikaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátēhe ch'ín Jesús ntáchro ch'án kixin:

—¿Á jie kuítekáonrá ní?

³² Ntá tsi tí yaon na mé jie tíha na ntá tsochakonrá jnkójnkora tsoxíkará sátsjirá ntá tsitōnará janhván tsjak'é. Kjánchó jehya janhván tjén. T'aná mé tjékian.

³³ Tjéjtōnkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejot-jasóterá kjánchó chrakonhyará kixin janhan mé ó kjuixin kjuacha tsétōan. A ntá tí chjasintajni la kjuachahya ts'etōan —ichro ch'án.

17

Ch'ín Jesús chrónóēhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha.

² Jaha tsíchjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsochjéhe kjuachón jnkochrín kaín tí sín tsíchjehé ch'án.

³ Tí kjuachón jnkochrín mé t'axrjexín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuénhén ch'án kui ch'án ntihi chjasintajni.

⁴ Ó kjuixin kjuíkosáyaha tí jaha ntihi chjasintajni kjuixinna tí xra chjina sit'a.

⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxa k'ónahya chjasintajni.

⁶ Ó kjuixin kjuákohá tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákohá sín itán la ntá ijie la ó kuítekaon sín.

⁷ Ntá jie ó kjuátsoan sín kixin kaín tí kjuachaxin chonta janhan la jaha tsíkjánjuan.

⁸ Kixin ó kjuixin kjuákohá sín tí tán chjina jaha, ntá kuítekaon sín, ntá kuénxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni siín chjasintajni.

Náhi. Jehó xrjanóaha kixin chrók'uayakonhén tí sín chjina kixin kuèntá sín.

¹⁰ A ntá kaín tí nkehe chonta janhan na mé kuèntá jaha la ko kaín tí nkehe kuèntá la mé kuèntana kjaxin. A ntá tí kjuachaxin jié kuèntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohé sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxí tí jaha la ko janhan jnkokoá tjenkayáxinni.

¹² A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjányanhya sín. A ntá jnkokoá nkexro mé k'uitjányan mé tí ch'ín xráxín ts'itjányan kixin xikaha tsoxiteyá éxí nixja tí xroon tsíkjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxí yóhe imá chàna.

¹⁴ Janhan mé kjuákoḥa sín itán jaha, a ntá jie tí sín chjasintajni mé nínkakohen tí jehe sín kixin jehe sín la jehya kuènte chjasintajni éxí kjaxin janhan na janhya kuèntana chjasintajni.

¹⁵ Tjáncháhya kixin chrókuakítsjehé sín chjasintajni. Náhi. Tjáncháhá kixin chrók'uayakonhén sín kixin chrókjuich'iyehya sín tí Jínahya.

¹⁶ Jehe sín la jehya kuènte chjasintajni éxí yóhe janhan kjaxin janhya kuènte chjasintajni.

¹⁷ Nchetjuáxian sín tí kjuachaxin kuèntá kixin itán jaha mé tí tan chaxín ntoá.

18 Éxí yóhē jaha kuétuanna k'uinka chjasintajni mé xikaha janhan tétuannhan sín kixin chrók'uejójákan sín tí sín chjasintajni.

19 Jehó tí xrā kuèntá chrókjuít'a kixin chrókjuinkitsa tí jehe sín, a ntá jehe sín kjaxin chrókjuich'e sín tí xrā kuèntá kixin kuínhin sín itán chaxín ntoá.

20 'Kjánchó jehya kixin xrjanóaha kixin chrókjuinkitsa tí jehó sín. Náhí. Kjaxin xrjanóaha kixin chrókjuínkitsa kaín tí sín tsitekaon sín chr'éxin tsinhin sín tí nkehe tsochrónka tí sín a.

21 Mé xikaha xrjanóaha kixin kaín tí jehe sín jnkokoá chrókjuenkayáxin sín éxí jaha It'éni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsíkétuanna k'uinka ntihi.

22 A ntá tí kjuachaxin jié chjina na mé tjaha tí jehe sín kixin ntá kaín sín jnkokoá chrókjuenkayáxin sín éxí yóhē jaha la ko janhan jnkokoá tjenkayáxinni.

23 Janhan la ko jehe sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuèhé tí jehe sín éxí yóhē tjuana tí jaha.

24 'Jaha It'éni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxa k'ónahya chjasintajni k'uétjuana jaha.

²⁵ It'éni jaha, imá jína jaha. Kjónté tí sín chjas-intajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka.

²⁶ Ó kjuákoha sín kixin nkexro tí jaha la ko xikaha naxa tsjáqoha sín, kixin éxí tjuana jaha mé xikaha chrótjuèhe sín kichó sín la ko janhan chrók'uejóqian tí jehe sín —mé xikaha chrónoèhe ch'ín Jesús tí It'é ch'án.

18

*Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)*

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijnko nonte siín nchónhya nta k'uixenhen ch'ín Jesús la ko tí sín k'uájiko ch'án.

² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a.

³ A ntá ch'ín Judas ó kjuikao ch'án nchónhya sín soldado la ko iso sín policía kuènte njnko tsík'etuèhen tí sín nchat'á t'etqan la ko tí sin fariseo. Ntá kjui sín kaín sín xraá sín chica la ko kjuikao sín xrohi t'inkaséyanxín tí kjuixín sín.

⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsíkji_xin chjasin Nazaret
—ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinčekji tí ch'ín Jesús
mé koí tjenkákjan ch'án tí jehe sín ntíha.

⁶ A ntá tío kjuátehe ch'ín Jesús kixin jehe ch'án
tíha, ntá jehe sín xráchonka sín kjuítsínka sín nonte.

⁷ Ntá xíkjančankí ch'ín Jesús ínaá ntáchro ch'án
kixin:

—¿Nkexro xritjéyará? —ichro ch'án.

Ntá xíntáchro sín kixin:

—Tjeyáni tí ch'ín Jesús tsíkji_xin chjasin Nazaret
—ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí
xritjéyará tí janhan ntá títóhéra sátsji tí í so sín
xríkian —ichro ch'án.

⁹ Mé xíkaha ntáchro ch'ín Jesús kixin ntá tsox-
iteyá tí nkehe tsíntáchro ch'án kixin: “Tí sín kjuan-
jon T'aná la ninkexró kjuíntak'itjáyanhya.”*

¹⁰ Ntá ch'ín Simón Pedro kuakitsje ch'án tí chica
espada chrinkatoxin ch'án kóchrínjin ch'án tątsjon
chjina ijnko ch'ín it'in Malco, mé ijnko ch'ín ch'ehe
nchat'á t'etoan xra.

¹¹ Kjánchó ch'ín Jesús ntáche ch'án tí ch'ín Pedro
kixin:

—Chr'axenhén tjoé chica espada méhe. Kjá
ntáchrua kixin tsjasótehyana, kjá ichrua. Kjánchó
T'aná kjuanjon kjuachaxin kixin nchónhya ts-
jasótena —ichro ch'án.

* **18:9** Juan 17.12

Ch'ín Jesús kjuák'e nkayakon tí ch'ín t'etuenhen tí sín nchat'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí sín comandante t'etuenhen sín la ko tí sín policía judío kuènte nínko mé itsé sín tí ch'ín Jesús kjuínchenteto sín ch'án.

¹³ A ntá sákjuíko sín ch'án ntøe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etoan tí nánó a.

¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kixin íchá jína kixin jnkokoá chojni chrók'uenyákonhen kain tí sín ch-jasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etoan. Ntá k'uixenko ch'án tí ch'ín Jesús tí ntasin ntøe tí nchat'á t'etoan.

¹⁶ Kjánchó ch'ín Pedro kuitøhe ch'án ntója ntasin ó. Ntá tí ch'ín ijnko a chóxin tí nchat'á t'etoan mé k'uaxrje ch'án ntasin nixjehe ch'án tí tjan t'ayakonhen tí ntója ntasin chrónóehe ch'án tjan ntá xranjon kjuachaxin ntá k'uixenhen ch'ín Pedro kjaxin.

¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.
Ntá kjuátøhe ch'ín Pedro kixin:

† 18:14 Juan 11.49-50

—Náhi, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etoan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etoan kjuankíxin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakohé ch'án sín.

²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuàkua, la ntá kaín xín chojni kuínhin sín. Xráxín k'uékjákoxian kaín xín tí nínko ntsí la ko tí nínko jié tójnkotséxin kaín xín sín judío. Ninkehó nkehe kjuákohya imó.

²¹ ¿Nkekuèté tjanchankìna tí janhan xíkaha? Chrókjuanchankíhi tí sín kuínhin kixin nkexrí kjuákoḥa sín. Jehé sín mé nohe sín nkehe kjuákoḥa sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policia kuènte nínko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xíkaha jiéhe tsjátehé tí nchat'á t'etoan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chronka nkehe tí ntoáhya. A ntá tí ntoá tí nkehe xrjanka, ¿ntá nkekuèté kixin tjatena? —ichro ch'án.

24 Ntá k'ueṭoan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchaṭ'á t'ṭoan.

Ch'ín Pedro xíkjinchemá ch'án inaá kixin chóxin ch'án tí ch'ín Jesús

(Mt. 26.71-75; Mr. 14.69-72; Lc. 22.58-62)

25 Ntá ch'ín Simón Pedro mé naṣa tjeṣín toṭé ch'án tjechjixrohe ch'án. Ntá kjuanchankíhi sín ch'án kixin:

—¿Ákjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

26 A ntá ijnko ch'ín ch'ehe tí nchaṭ'á t'ṭoan xra, na mé tí ch'ín a mé naṣa kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Ájehya jaha tí k'uíquān tjekoa ch'án tí huerto ní? —ichro ch'án.

27 Ntá ch'ín Pedro xíkjinchemá ch'án inaá kixin jehya ch'án, ichro ch'án. Ntá xrinaḡhya tuénxín itsje ijnko kochíntoā.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

28 Ntá k'uaxrjexín sín ntōe ch'ín Caifás, sákjuíko sín ch'ín Jesús tí palacio t'ṭoanxín tí ch'ín gobernador. Ntá ó kjuankixin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xíkaha chrók'uixenhen sín tí nchia a la chrókuamá sín tí jiē síin ntiha la í xitjahya sine sín tí kia pascua, ichro sín.

29 **A** ntá ch'ín Pilato k'uaxrjexín ch'án tí nchia t'et̄oanxín ch'án kjuanchankíhi ch'án sín kixin:

—¿Nkehe tí jie chón̄ta tí nkexro i? —ichro ch'án.

30 Ntá kjuát̄ehe sín ntáchro sín kixin:

—Tí chróchóntahya ch'án jie jie la chrókjuik̄oahyani ch'án —ichro sín.

31 Ntá k'uēt̄oan ch'ín Pilato kixin:

—Sátjikoará ch'án nchekitoexínrā nkerí jie chón̄ta ch'án kixin éxí ntáchro tí ley kuentará —ichro ch'án.

Ntá kjuát̄ehe tí sín judío ntáchro sín kixin:

—Jeheni chojni judíoni la chón̄tahyani kjuachaxin ts'óyánni ninkexró —ichro sín.

32 Mé xikaha tsoxiteyá tí nkehe tsíntachro ch'ín Jesús kixin nkexrí ts'enxín ch'án.

33 Ntá ch'ín Pilato xik'ixenhen ch'án tí nchia t'et̄oanxín ch'án ntá k'uíȳeh̄e ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'et̄uēhen tí sín judío ní? —ichro ch'án.

34 Ntá ntáchro ch'ín Jesús kjuanchankí ch'án kixin:

—Tí nkehe tjanchankìná, ¿á jahyá kjuenkayáxian xikaha, o á í jnko nkexro kjuanchia jie kixin tí janhan? —ichro ch'án.

35 Ntá kjuát̄ehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nch̄at'á t'et̄oan mé kjuikaán sín tí jaha. ¿Xá nkehe kjuich'e kixin? —ichro ch'án.

36 Ntá kjuát̄ehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuēt̄oan. Náhí. Tí chrókuēt̄oan chjasintajni ntá tí sín xrik̄ian chrókjuanj̄onko sín tí sín

judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrua jaha. Tí xrā ó kokjina la ko tí xrā ó k'uinka chjasintajni kixin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrua? —ichro ch'án.

Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sin judío nixjehe ch'án sín ntáchro ch'án kixin:

—K'úitjáhya ninkehó jie chóna tí nkexro i.

³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etuenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetōan ch'án kixin tsjate sín tí ch'ín Jesús.

² Ntá tí sín soldado kjuích'éna sín ntach'i ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehe sín tsjikosáyehe sín ch'án éxi ijnko rey, kjánchó chaxínhya tíha.

³ Ntá kóchjinehe sín tí tjen ch'án ntáchro sín kixin:
—Isé tsjak'e tsétuēnhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etōanxín ch'án inaá nixjehe ch'án tí sín tsíkójnkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'i la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uíkon tí sín nchat'á t'etōan la ko tí sín policía kuēnte nínko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátēhe tí sín judío kixin:

—Jeheni chojni judío mé chóntani ijnko ley t'et̄oan kíxin chrók'uen ch'án kíxin ncheyóhe ch'án asén ch'án kíxin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án

⁹ ntá xík'ixenhen ch'án tí nchia t'et̄oanxín ch'án inaá kjuanchankíhi ch'án tí ch'ín Jesús kíxin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuát̄ehya ch'án.

¹⁰ Ntá ntáchro ch'ín Pilato kíxin:

—¿Jaha nkekuènté tját̄ehya nkehe tjánchánkíha?

¿Á noahya jaha kíxin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kíxin sátsjia kohya nkehe tsonhan? —ichro ch'án.

¹¹ Ntá kjuát̄ehya ch'ín Jesús ntáchro ch'án kíxin:

—Ninkehó kjuachaxin chróchontahya jaha chrókuétoan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jié jié chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'uet̄oan ch'án kíxin sáchrókjuia ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsitohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'et̄uēnhen tí nación kuènténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'et̄uēnhenni —ichro sín.

¹³ Ntá kuínhin ch'ín Pilato tíhi ntá k'uet̄oan ch'án kíxin tsakitsje sín tí ch'ín Jesús ntója ntá ch'ín Pilato

kjuák'etjaxin ch'án tí silla nchekitoexín ch'án jie, mé nkíva hebreo mé it'in Gabata, mé t'axrjexín kixin tjat'o noi jehó xro tsík'óna.

¹⁴ Na mé ó chjina chonkixin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntíhi itjen tí ch'ín rey kuéntará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkani ijnko ntacruz tí ch'ín rey kuéntará ní? —ichro ch'án.

Kjánchó tí sín nchat'á t'etōan mé kjuátēhe sín kixin:

—Náhi. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuíko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo tikítexín sín Hueso Kja Chojni. A ntá nkíva hebreo mé tikítexín sín Gólgota.

¹⁸ Ntaha mé kjuak'enkáni sín ch'án tí ntacruz. Ntá kjaxin yaá sín nánánko k'uéjō jnkojnko sín ntá jnkosiné kjuák'e ch'ín Jesús.

¹⁹ Ntá k'uētōan ch'ín Pilato kixin tsokjin sín ijnko ntachiso tsjak'enkáni sín ikja tí ntacruz ntáchro

kíxin: “Ch'ín Jesús kjuixín ch'án chjasin Nazaret, mé tí ch'ín Rey kuènte tí sín judío”, tsixro.

²⁰ A ntá itsjé tí sín judío mé kjuínchekuáxin sín tí letra tsík'óna kíxin chjino tí chjasin Jerusalén tsíkjak'enkani sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín.

²¹ Ntá tí sín nchat'á t'etōan kuènte tí sín judío mé ntáche sín tí ch'ín Pilato kíxin:

—Chrókjinhya jaha xikaha kíxin jehe ch'án mé tí “Ch'ín Rey kuènte tí sín judío.” Náhí. Íchá jína chrókjian jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuènte tí sín judío” —ichro sín.

²² Kjánchó kjuátehe ch'ín Pilato kíxin:

—Tí letra kuétoan k'óna la ó k'óna, kjónté xikahó tsitōhe —ichro ch'án.

²³ Ntá tí sín soldado tió tsíkjin tsíkjak'enkani sín tí ch'ín Jesús tí ntacruz ntá kuákja sín tí ké ch'án la k'óxikeyehe sín jnkojnko ka kuákja sín kanoé sín. La ko kjaxin kuákja sín tí ka kjínjin k'uék'inkáya ch'án. Tí ka mé tsixronhya ka la me jnkokoá ka tíha.

²⁴ Ntá tí sín soldado kjo sín kichó sín ntáchro sín kíxin:

—Tsótséchjehyani tí ké ch'án. Íchá jína sich'exínni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kíxin: “Kjuích'exín sín suerte ntá k'óxikeyehe sín kaná.”* Mé xikaha kjuích'e tí sín soldado.

²⁵ A ntá chjino tí ntacruz kjuák'enkani ch'ín Jesús mé kjuák'e tí iné ch'án la ko tí tjan kichó tjan mé

* 19:24 Salmo 22.18

tjan María ichjién ch'ín Cleofas, la ko tí tjan María Magdalena.

²⁶ A ntá tió k'uíkon ch'ín Jesús kixin itjen tí ìné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjehē ch'án tí ìné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehē ch'ín Jesús tí ch'ín a ntáchro ch'án kixin:

—Tsjehé kixin ntaha itjen ìná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntøe ch'án k'óna éxí ìné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén nta.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjínjin, ntá kjuínchechrìn sín tí tjen ir'va ch'án.

³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo

kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xikaha kjuanchehe sín tí ch'ín Pilato kixin ts'etōan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en.

³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús.

³³ Ntá kjuíji sín tí tjen ch'ín Jesús ntá k'uíkon sín kixin ó tsíkjixin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko ìnta.

³⁵ A ntá janhan mé tjékjian tí xroon i mé kjuak'é ntiha k'uíkuan kixin xikaha kónhen ntá ntoá tjéxrjanka kixin jahará kjaxinrá chrókuítekáonrá.

³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésōe ch'án.”†

³⁷ Kjaxin itjen íjnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixín chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín

† 19:36 Salmo 34.20 ‡ 19:37 Zacarías 12.10

Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús.

³⁹ Kjaxin ch'ín Nicodemo, tí ch'ín kjuínixjehe tí ch'ín Jesús ijnko tie a mé kjui ch'án kjuikao ch'án treinta kilo xroan xraxé tjiko xroan mirra la ko xroan áloes.

⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en.

⁴¹ Tí kjuák'enkani ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha.

⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankíxin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixín semana ntá tí tjan María Magdalena naxa sítié sákjuí tjan tí tjen tí tòye, ntá k'uikon tjan kixin ó tsíkjin tí xro tsík'íkjàxin tí tòye a.

² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjexín sín tòyè tí cuerpo kuènte Ìnchéni ntá noehyani nketí tsíkjak'e sín —íchro tjan.

³ Ntá ch'ín Pedro la ko tí ch'ín í jnko mé kuínhin sín xíkaha ntá sákjuí sín tí tjen tí tòyè a.

⁴ Ntá yóí sín kuinká sín sákjuíko kíchó sín. Kjánchó tí ch'ín í jnko antsí tjiàn kuinká ch'án ntá kánhyó tjiàn kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòyè a.

⁵ K'uísén ch'án tsjehe ch'án nkaxenhen tí tòyè a. A tí ka tsík'isímá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòyè a.

⁶ Ntá kjónté chr'éxín kjuíji ch'ín Simón Pedro ntá k'uixenhen ch'án tí tòyè a. Ntá kjaxin k'uíkon ch'án kixin tjejó tí ka tsík'isímá ch'ín Jesús

⁷ la ko k'uíkon ch'án tí ka tsík'isímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin.

⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkjií senó na kjaxin k'uixenhen ch'án tí tòyè ntá k'uíkon ch'án tí nkehe tsíkónhen ntá kuítekaon ch'án.

⁹ Kixin naxa k'uékienxínhya sín tí nkehe k'uéchrónka xroon itén Dios kixin t'ichjánxín tsoxechón tí ch'ín Jesús.

¹⁰ A ntá tí sín sátsíkjiítsjehe tòyè la xíkjan sín ntoe sín.

Titàya k'uíkuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítóhe tjan ntója tí tòyè tsjánka tjan. Naxa tsjánka tjan k'uísén tjan tsjehe tjan nkaxenhen tí tòyè

¹² ntá xrínahya k'uíkon tjan yaá sín ángel tjejóyá sín ka tjóá tjejótxaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án.

¹³ A ntá tí sín ángel mé kjuanchankí sín kixin:

—Naná, ¿kuènte tsjanka? —ichro sín.

Ntá kjuátēhe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án.

¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjanka? ¿Nkexro tjéyá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chronka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkiva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxa sátjíhya janhan tí tjen T'aná. Sátjia tjítsjehé tí sín kichiná chénka sín kixin

sátsjiyá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xikaha tsík'ikon tjan Ìnchéni. La ko kjaxin chrónka tjan kixin xikaha tsíntáchro ch'án.

Tí sín k'uék'ajiko ch'ín Jesús titàya k'uíkuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ A ntá ó kónjín tí yaon a mé tí yaon xrankíxixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni.

²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuñhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios.

²³ Tí ts'itjányanhanrá tí jie kjuasin jnkójín chojni ntá xikaha tsjlin tí ijié sín. Ntá tí ts'itjányanhyará tí jie kjuasin jnkójín chojni ntá naxa kjuìnhyá tí ijié sín —ichro ch'án.

Ch'ín Tomás k'uikon ch'án kixin tsíxechón Ìnchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tìkìtèxín sín ch'ín Nóhé mé kohya ch'án tí kui ch'ín Jesús.

²⁵ Ntá chr'èxìn tí í so sín k'uék'ajiko ch'ín Jesús ntáche sín ch'án kixin:

—Ó k'uikonni Ìnchéni —ichro sín.

Kjánchó ntáchro ch'ín Tomás kixin:

—Tí tsíkìnhya janhan tí tsíkjiatèxín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'íkjehe sín ntója nchia jina ntá xrínahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatèxín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekavan kixin chaxín —ichro ch'án.

²⁸ Ntá kjuátèhe ch'ín Tomás ntáchro ch'án kixin:

—Ìnchéni jaha la ko Dios kuèntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuítekavan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uíkon tí sín k'uájiko ch'án kjónté chrónkahya tí xroon i kixin xíkaha kónhen.

³¹ Tí nkehe chrónka tí xroon i ikjian janhan kixin chrókuítekáonrá jahará kixin Jesús mé tí Cristo, mé tí Xjeen Dios kixin ntá kain ni chróchóntani kjuachón jnkochrín kixin chrókuítekaonni ch'án.

21

Yato tí sín k'uék'ajiko ch'ín Jesús xrínahya titàya k'uíkon sín ch'án

¹ A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xíkaha kónhen

² kixin jnkokoá k'uéjéjó sín ch'ín Simón Pedro la ko ch'ín Tomás, me tí ch'ín tikitexín sín ch'ín Nóhé, la ko ch'ín Natanael kuixín ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátēhe sín kixin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabarco. Kjánchó ninkehó koche tséhya sín kuenté tie.

⁴ A ntá ó chjina ts'inkaséyan ntá xrínahya titàya k'uíkon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án kixin jehe ch'án.

⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabáro la tsotserá va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhya koche tjinká.

⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—¡Inchéni tí méhe! —ichro ch'án.

Ntá kuínhin ch'ín Simón Pedro kixin Inchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuiánkí ch'án ntá.

⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuikao sín tí ntabáro tinkánkákjentóxin tí nchísén tjinká koche chrítaón ntá kixin ijnko ciento metro kjínxin tí chrínta ntá k'uéjé sín.

⁹ Ntá kjuíji sín chrínta ntá ntá k'uínkajinxin sín tí ntabáro ntá k'uikon sín tjeche xrohi síxènkí xrínta ntá chrítaón tí xrínta tjejen ijnko koche la ko nánko siín niotja.

¹⁰ Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uit'ótjen ch'án tí ntabáro kuákja ch'án tí nchísén kuínkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a.

12 Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsəan sín kixin Ìnchéni tíha.

13 Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xikaha xíkjanjon ch'án tí koche.

14 Tíhi mé nixin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

15 Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátəhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

16 Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátəhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

17 Ntá nixin kjuanchankí ch'ín Jesús kixin:

* 21:14 Juan 20.19,26

—Jaha Simón, xjeen Jonás, ¿á tjinkávan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Inchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuèntana.

¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tió tsotáda jaha ntá tsjéntoá tjá ntá íjnko nkexro sintak'inkáya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án.†

²¹ Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Inchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátéhe ch'ín Jesús kixin:

† 21:20 Juan 13.25

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhe tí janhan —ichro ch'án.

²³ Ntá kjuankíxin kjo tí sín k'uék'ajiko ch'ín Jesús kíxin ts'enhya tí ch'ín a. Ntá jehya kíxin ntáchro ch'ín Jesús kíxin chrók'uenhya tí ch'ín a. Náhí. Ó jehí ntáchro ch'án kíxin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ A ntá tí nkexro a mé tí nkexro chrónka kíxin chaxín kónhen kaín tíha la ko ikjin ch'án tí xroon í. Ntá ó noheni kíxin tí nkehe tsíkjin ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kíxin kjá chrókjuachahya tí chjas-intajni chrók'uinka kaín tí xroon chrók'óna xíkaha. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
b9b09122-b3f6-59f0-9594-749907b32b5b